

Pupulan Puisi Bali Modérn

DĒNPASAR LAN DON PASAR



Pamipil

| Nyoman Darma Putra

| Giedé Gita Purnama, AA Ngurah Oka Wiranata

Pupulan Puisi Bali Modérn

Dénpasar lan Don Pasar

Pamipil:

I Nyoman Darma Putra
I Gedé Gita Purnama
AA Ngurah Oka Wiranata

Pustaka Ekspresi
Pemerintah Kota Denpasar

Dénpasar lan Don Lawar

Penerbit :

Pustaka Ekspresi

Didukung Pemkot Dénpasar

Sampul : Gusryan

Ilustrasi : Nyoman Gunarsa

Tata Letak : I Madé Sugianto

Cetakan Pertama:

Oktober 2013

ISBN:

978-602-7610-11-8

Sambrama Wacana

Angayu bagia aturang titiang santukan pupulan puisi mabasa Bali *Dénpasar lan Don Pasar* prasida kawedarang. Kawéntenan buku puniki anggén ngukuhang tetujon Dénpasar dados Kota Berwawasan Budaya lan tetuwek pemréntah utawi parajana jaga nglimbakang basa Bali.

Basa Bali mageng pikenohnyané ring kauripan i raga soang-soang. Tiosan pinaka srana magendu wirasa, taler madaging unteng wiwéka sané katamiang olih panglisiré i nguni. Iraga sareng sinamian patut éling lan nglestariang basa Baliné antuk nincapang kadyatmikan mangda prasida kasobiahang majeng ring sameton ri wekas.

Puisi-puisi sané mapupul ring antologi puniki metu saking kalanguan basa, sané prasida ngicénin genah matetimbang majeng para warga kota. Tiosan ring punika, taler kaanggén nguripang taksun kota Dénpasar miwah pinaka srana anggén ngruruh Dénpasar sané becik ri wekas. Dénpasar boya ja kota sakadi kota sané ketah kauningin, Dénpasar mabinayan sareng kota sané lianan. Dénpasar wantah “paumahan” sametoné sami. Linggih i raga sareng sami puniki patut kajaga mangda setata asri, degdeg, lan nglangenin. Pemréntah sampun mausaha lan sayan nglimbakang unteng pikenoh puniki malarapan saking sesanthi “Denpasar Kotaku Rumahku”

Murdha pupulan puisi puniki nglangenin taler nyihnayang kasujatian kahanan Kota Dénpasar. Pastika sampun kapikolihang saking anggit-anggitan basa kakawian sané kaambil saking sinalih

puisi-puisi sané kapupulang. Lian ring murdha, titiang bagia ring kawéntenan pupulan puisi mabasa Bali puniki mawit saking tetiga tetimbang sakadi ring sor puniki.

Kapertama, puisi-puisi ring pupulan puniki nyihnayang Dénpasar lan wewidangyané pinaka kota sané prasida ngicénin pamarga majeng ring para pangawi. Nanging sujatinnyané, Dénpasar sampun saking dumun taler ngicénin pamargi ring widang seni sané siosan silih tunggilnyané gending *Dénpasar Moon* sané kalimbakang olih *penyanyi* Pilipina Maribéth ring warsa 1990-an.

Kaping kalih, kriya sastra ring pupulan puniki katah madaging unteng pikayunan lan kalangenan sané prasida ngwewehin taler ngukuhang pamugeh Dénpasar dados Kota Berwawasan Budaya sané kasobiahang sampun dasa warsa. Pamugeh Kota Berwawasan Budaya tiosan ring madué tetamian marupa wewangunan sejarah taler madué sastra sakadi puisi-puisi sané wénten ring pupulan puniki.

Kaping tiga, pinaka angen-angen saking Kota Berwawasan Budaya, Dénpasar nénten wantah nguratiang tetamian budaya sané riin kémanten nanging taler nguratiang budaya sané nglimbak ring galahé mangkin. Seni kontémporér silih tunggilnyané.

Pemréntah Kota Dénpasar ngaturang suksma majeng ring editor sané sampun lédang mupulang puisi-puisi puniki. Domogi pamipil sané utama sakadi puniki sayan-sayan nglimbakang pamargin Dénpasar dados Kota Berwawasan Budaya.

Dénpasar, 20 Septémber 2013

Walikota Dénpasar

Ida Bagus Rai Dharmawijaya Mantra, SE, M.Si.

PAMABAH

Bukuné puniki nénten lian wantah buku kaping kalih sané medal miwah madaging pupulan puisi indik kawéntenan Kota Dénpasar. Buku kapertama nganggén Basa Indonésia sané mamurda *Déndang Dénpasar Nyiur Sanur*, sané medal ring panguntat warsa 2012. Buku kapertama madaging 106 puisi sané karipta olih 45 pangawi, kaluncurang olih Walikota Dénpasar, Bapak Ida Bagus Rai Dharmawijaya Mantra ring sajeroning acara Dénpasar Féstival 2012. Buku sané kaping kalih puniki pateh sakadi buku kapertama, sakéwanten basannyané mabinayan inggih punika mabasa Bali tur madaging 100 puisi. Puisi-puisi inucap taler nyihnayang kawéntenan Kota Dénpasar ngawit saking Puputan Badung ring warsa 1906 kantos rauh ring panglimbaknyané kadi mangkin.

Para pangawi ring buku puniki wénten sané ngwedhar indik Pasisi Sanur sané ngulangunin, Sakénan, Lapangan Puputan, Tukad Badung, jempiring putih pinaka cihnan Kota Dénpasar, taler nasi jénggo, ajeng-ajengan sané sampun kaloktah miwah kabaos *khas* ring kota Dénpasar. Nénten lali taler para pangawi nguningayang kaluihan miwah kaasrian sawah ring Renon sané kaloktah duké nguni antuk pantun sané pinih becik ring sawewengkon kota Dénpasar, kantos kahanan ring Monang-Maning sané masepuk kosekan sakadi mangkin. Buku puniki mamurda “Dénpasar lan Don Pasar”, kaambil saking murda puisi sané kakawi olih I Madé Suarsa. Puisi puniki wiakti ngulangunin tur nudut kayun sang sané ngwacén santukan prasida nyobyahang panglimbak Kota Dénpasar antuk kruna-kruna sané mapaiketan lengut saking pangawit kantos puput.

Kota Dénpasaré ring buku puniki kasurat antuk kruna-kruna sané suksmannyané murip tur ngwetuang kalanguan. Yéning inargamayang *kadi wareg tan paneda bungah tan panganggo* kabaos, ring sastra Kawi ketah kaucap *iccha nispriya*. Dénpasaré mangkin sering kabaos *kota modérn*, pusering praja mandala, genah seni miwah budaya, taler genah *sejarah*

masa jaya perjuangan sané kakawi olih pangawi antuk tata cara sané lian miwah nganggén basa sané lengut, raris prasida digelis karesepang suksmannyané olih sang sané ngwacén. Panglimbak jagaté sakadi mangkin sané ngawinang sahananing sané wénten ring Dénpasar prasida kasurat tur kamedalang dados buku. Malarapan buku puniki, dumogi sang sané ngwacén prasida amukti kalanguan tur uning ring kawéntenan miwah panglimbak Kota Denpasaré. Pamargi miwah panglimbak ring Dénpasar nénten ja prasida kawacén ring buku sejarah kémanten utawi ring ekalikita (*monografi*) ring sajeroning désa-désa pakraman, taler sida kawacén ring karya sastra minakadi puisi.

Nénten ja sinamian pangawi sané ngripta puisi ring buku puniki jenek ring Bali. Wénten kekalih pangawi sané malinggih ring dura Bali minakadi Pandé Kadék Juliana (Jakarta) miwah D.G Kumarsana (Lombok). Pandé Kadék Juliana nénten asli saking Dénpasar, ipun saking Bangli sakéwanten sampun limang warsa jenek ring Dénpasar sadaweg kuliah ring Fakultas Sastra. Mangkin ipun makarya ring Departemén Agama Pusat Jakarta. Limang warsa ring Dénpasar punika sané ngawinang ipun madué crita sané nudut kayun indik kahanan ring Dénpasar.


Puisi-puisi ring buku puniki kakawi pantaraning warsa 1970 kantos 2013. Puisi sané pinih let inggih punika reriptaan I Madé Sanggra sané mamurda *Denpasar Sané Mangkin*. Puisi sané wénten ring buku puniki wénten sané kaambil saking buku lianan sakéwanten makéh puisi anyar sané kakawi santukan para pangawi madrebé pikayun pacang nyarengin makarya reriptaan ring bukuné puniki. Kirang langkung 40 warsa (1970 kantos 2013) masa puisi-puisi puniki kakawi manawi prasida ngicén sesuluh indik pamargi miwah panglimbak sané wénten ring Dénpasar. Dénpasar nénten ja genah sané ngulangunin antuk seni miwah budaya kémanten, sakéwanten taler dados kota modérn sané nénten sida luput saking makudang pikobet kantos tambis-tambis reg adicita budayané. Panglimbak globalisasi sakadi mangkin ngawinang budaya sané wénten ring Dénpasar sayan-sayan rered, sakadi sané sampun kaaksi olih para pangawi kantos sida mungghah ring bukuné puniki.

Puisi sané wénten ring buku puniki kasusun nganutin parab pangawi, sajabaning puisi sané mamurdha *Dénpasar lan Don Pasar* sané kakawi olih I Madé Suarsa tur kagenahang pinih ajeng santukan kanggén murdhan buku.

Nglimbakang Puisi

Buku puniki mijil pinaka silih tunggil usaha nyobyahang miwah nglimbakang sastra Bali modérn, utamin ipun puisi. Yéning katilik saking panglimbak sejarah sastra Bali modérn, puisi ungkuran embas, yéning bandingang sareng cerpén miwah roman. Cerpén nganggén basa Bali sané kapertama medal ring pantaraning warsa 1910 miwah 1920 kakawi olih I Madé Pasek miwah Mas Niti Sastro. Punika taler roman sané kapertama nganggén basa Bali medal ring warsa 1931 mamurdha *Nemoe Karma* kakawi olih Wayan Gobiah. Puisi nganggén basa Bali sané kapertama wawu medal ring warsa 1959 mamurdha *Basa Bali* kakawi olih Suntari Pr. Puisi puniki munggah ring majalah Médan Bahasa Bali, No. 1, Th. 1 Maret 1959, ring kaca 30. Yadiastun kantos mangkin durung majanten kauningin sapa sira Suntari Pr sang pangawi puisi punika. Yening tilikin saking kahanané punika, doh dumunan embas cerpén mabasa Bali malih 40 warsa badingang sareng puisi ring panglimbak sastra Bali Modérn.

Akéh taler wénten buku-buku puisi sané embas indik Dénpasar ring warsa sané sampun lintang, minakadi *Dénpasar Dalam Sajak* (Madé Sukada, 1973), *Dénpasaraya* (GM Sukawidana, Edt. 2008), *Déndang Dénpasar, Nyiur Sanur* (Darma Putra, Gita Purnama dan Oka Wiranata, Edt. 2012), makatatiga buku punika nganggén basa Indonésia. Buku indik puisi sané nganggén basa Bali durung wénten kantos mangkin. Punika mawinan buku *Dénpasar lan Don Pasar* puniki pacang kacatet ring sejarah sastra Bali modérn pinaka buku puisi mabasa Bali sané ngeninin indik Dénpasar sané pinih pertama.



Sesuluh Panglimbak Dénpasar

Tetujon buku puniki kamedalang taler kanggén mangda dados sesuluh panglimbak kota Dénpasaré sané nénten prasida katepasin sami, kawéntenan-kawéntenané punika salanturnyané prasida dados *catatan pribadi* mantuka ring sang sané ngwacén. Maosang indik budaya, utaminipun sastra, Dénpasar madrebé sang mahakawi inggih punika Ida Cokorda Madé Dénpasar (Ida Cokorda Mantuk Dirana) miwah Ida Pedanda Madé Sidemen. Ida Cokorda Madé Dénpasar pinaka murdaning jagat, pamucuk ri kala puputan taler pangawi sané anglanglang kalangwan. Ida Pedanda Madé Sidemen, wredapandita sané ngicén tuntunan agama ring parajana Baliné antuk kayun lascarya taler pinaka mahakawi sané sampun putus ring tutur aji. Silih tunggil puisi sané wénten ring buku puniki nyihnayang makalih sang mahakawi puniki sakadi bahni sané nyunarin Dénpasar, puisi sané kakawi olih Raka Sukmadi mamurdha “Surya Téja Kembar” nyihnayang sapunapi kawéntenan sang mahakawi punika ngawinang jagat Dénpasar kaloktah malarapan antuk basa, aksara, miwah sastra Bali.

Ida Cokorda Madé Dénpasar
Ida Padanda Madé Sidemen
Prabu lan wiku atateken sastra
Ngulik aksara ngulati lengkara
paras paros sarpanaya
Tios linggih béda lungguh
Nanging suéca lan bakti
Ngardi rahayu Badung ugi

Yadiastun wangsandidané mabinayan, brahmana miwah ksatria, sakéwanten pikayunandidané wantah asiki, ngulik sastra, maosang indik dharma malarapan antuk pupulan krana sané sida ngwetuang wangun candi basa sané dahat mautama. Kawéntenané punika yukti prasida dados suluh mantuka ring parajana kota Dénpasaré, nénten ja sadaweg ida sang kalih kantun nyeneng kémanten, sakéwanten tumus kantos mangkin anggén jalaran nglimbakang basa, sastra, miwah aksara Baliné.

Kota Dénpasar saking riin sampun kaloktah dados “kota

perjuangan". Indiké punika kacihnayang ring Puputan Badung warsa 1906 parajana Dénpasar miwah sang angawa rat duké punika mabéla pati nindihin jagat Badungé. Puputan Badung makéh kadadosang bantang kakawian olih para pangawi ring buku puniki yadiastun kawéntenané punika sampun lintang ring satus warsa. Rasa érang ring puputan kantos mangkin kantong rumaket ring kayun para pangawiné. Sané dahat nudut kayun inggih punika petang (4) puisi indik perang Puputan Badung sané kakawi olih I Nyoman Manda, silih tunggil pangawi saking Gianyar tur I Gdé Dharna, pangawi sané sampun kasub saking Singaraja. Tiosan ring puisi puniki, Nyoman Manda taler nlatarang indik perang puputan punika ring sajeroning *trilogi novél* sané sampun kamedalang ring warsa 2011. Indiké puniki nyihnayang sejarah taler prasida kasurat malarapan antuk kruna sané kaiket antuk uger-uger sastra, yadiastun nénten ja pinaka *dokuméntasi* sejarah.

Nénten wantah puputan kémanten sané ngawinang parajanané éling ring Dénpasar. Tios punika, makéh taler genah sané dados pangéling-éling kawéntenan kota Dénpasaré duké riin. Rasa iseng majeng ring kota Dénpasar ngawinang anaké sané naenin polih rauh ka Dénpasar kadaut kayunné jagi mawali malih, pamekas Jalan Gajah Mada sané ramia pisan pinaka genah maadolan sané nampek ring Pasar Badung. Genahé puniki mangkin taler pinaka cihnan kawéntenan ajeng-ajengané ring kota Dénpasar, silih tunggilnyané nasi jénggo. Kawéntenan nasi jénggo prasida ngawinang pangawi I Ketut Aryawan Kenceng nganggit puisi "Nasi Jénggo". Ring puisiné punika katlatarang nasi jénggoné wantah ajengan sadarana sané lais masepuk. Sadarana ring rupa miwah ring pangarga. Kawéntenané puniki sané prasida kacita rasa olih parajanané sané ngawinang ajengané satata karuruh yéning rauh ka kota Dénpasar. Dagang ajengané irika ring Jalan Gajah Mada sampun wénten duk warsa 1971. Antuk pangéling-éling duké riin sané maweweh-weweh ring wewidangan Gajah Mada, marginé punika dados "jalan kenangan" Makéh crita yéning critayang, pamuputnyané marginé puniki kamanggehang dados "Kawasan Heritage" wewidangan sané patut wrediang. Wewidangané punika sané setata naut kayun sang anglalana ring Dénpasar.

Dénpasar pinaka kota sané ketah kabaos kota modérn taler pinaka pusering praja mandala, nénten ja prasida lémpas saking panglimbak aab jagat sakadi mangkin. Kota Dénpasar sané sayan ngalimbak sampun

janten ngwétuang perobahan ring saluiring kahuripan, punika sané kaanggén bantang olih I Madé Sanggra ri kala ngawi puisi. Puisin danéné ring buku puniki marupa puisi nlatarang indik kawéntenan sawah sané sampun sayan rered, sakadi mangkin ketah kabaos *alih fungsi lahan persawahan* ring Dénpasar. Puisin Danéné mamurda “dénpasar sané mangkin” munggah ring koran *Suluh Marhaén* (sané mangkin *Bali Post*) 5 Séptémber 1971 (kakawi duk Agustus 1971):

MADE SANGGRA :

denpasar sane mangkin

denpasar sané mangkin
 katah pwangun njujuh langit
 makweh sawah dados umah
 umah dados sawah

denpasar sané mangkin
 paseliwer wong sunantara
 solah njané soléh soléh
 pajas njané mēlag éndah
 malalung makamben lambih
 matjukur maebok daw
 luh matingkah mwani

mwani macimbek

Augustus 1971.

‘Katah umah nyujuh langit’ nyihnyayang makéh pisan wewangunan sané matingkat, silih tunggilnyané inggih punika Hotél Bali Beach sané kawangun ring pasisi Sanur. Pinaka *pusering guna gina Bali*, taler silih tunggil genah pariwisata dunia sané sayan nglimbak, Dénpasar setata karauhin wong dura Bali miwah dura negara sané tetujonnyané pastika nénten sami becik. Kota Dénpasar, wantah kota genah ngruruh pangupa jiwa, ngrereh sarining urip, punika mawinan kotané sayan kosek. Nénten ja jadm Bali kémanten sané kadaut kayunné ring Dénpasar, warga ring sajebag Indonésia miwah duranegara taler kadaut, sakadi kasurat ring bait kaping kalih ‘Pasliwer wong sunantara’.

Kawéntenan Dénpasar sané akéh karauhin semeton dura Bali miwah duranegara ngawinang Dénpasaré mangkin mauwah dados *Kota Multikultur*. Nguni kabaos *Kota Agraris*, mangkin sampun mauwah dados *Kota Industri*, ninggal sakancan tetamian nyujur *modernisasi*. Yéning dumun sawahé dados genah ngrereh pangupa jiwa, sané mangkin sampun dados anggén ngrereh pangupa jiwa, ‘*umah dados sawah*’. Sawah-sawah sané jimbar sampun prasida dados kos-kosan, kaséwaang nyabran bulan, nénten ja nyantosang pantun sakéwanten “rupiah”. Manawi puniki sané prasida kacingak olih pangawiné pantaraning petang dasa warsa lintang, anut sakadi kruna ‘sané mangkin’ ring puisiné punika.

Dénpasar nénten ja setata paripurna, kawéntenan rwa bhinéda pastika pacang satia nyarengin panglimbak Dénpasar kantos ka pungkur wekas. Makakalih kabaos mabinayan sakéwanten mapaiketan, sakadi peteng-lemah, patut miwah iwang. Lianan ring puisi sané nyihnyang indik kaluihan miwah *kaagungan* Dénpasar, wénten malih puisi sané nuntun iraga sareng sami ngwetuang rasa angen nyingakin kawéntenan Dénpasaré, sakadi luhuné sané dados “tamiu” ring Tukad Badung, wénten ring bait indik *alih fungsi lahan* miwah kawéntenan anak istri jalir sané ketah kabaos *prostitusi*. Makasami pikobet sané nyarengin Dénpasar nénten prasida lémpas miwah katinggalin olih para pangawi ring bukuné puniki. Silih tunggil puisi sané ngunggahang indik rwa bhinéda Dénpasar inggih punika puisi “Dénpasar lan Don Pasar” sané kakawi olih I Madé Suarsa, dosén Fakultas Sastra Unud, saking Sukawati Gianyar sané sampun sué jenek ring Dénpasar. Sekadi uncaran ‘sida ning don’, kruna ‘don’ ring puisi puniki artinipun ‘tetujon’, untengnyané masesimbang antuk Dénpasar sané mangkin jati-jati sampun dados ‘tetujon’ warga sami rauh meriki sami jenek miwah ngruruh pangupajiwa, punika mawinan Dénpasar nyuti rupa dados genah sané ramia miwah kosek, sekadi pasar. Kahanané punika sané mawinang akéh sané mauwah saking kota Dénpasar sadaweg durun wénten Urbanisasi.

sadurung manusané membah mlabar dénpasar
 palemahan kota kantun asri binari
 katah genah nandur wit sekar
 makejit mangenyor i kaki kusir dokar
 ngateh muatan bajang mapotrék maklambi anyar

Napi sané sampun mauwah katlatarang sakadi ring sor:

sayan lingsir duh kota dénpasar
kalaning mangkin dados don pasar
tetujon sang ébeking dolar
pupulan wang wibuhin dinar
lan pasayuban jadma dura pitra kasar

Lianan malih, puisi puniki kakawi antuk wiletan kruna-kruna sané kapilih, luh, tur becik kaarsa. Paiketan krunané sané madué cita rasa becik, ring asapunapiné taler masesimbling ring warga Dénpasaré prasida nanging rasa éling kramané indik kotané mangkin sané sampun sami mauwah.

Pamuput

Makakalih buku puniki, inggih punika *Déndang Dénpasar Nyiur Sanur (2012)* miwah *Dénpasar lan Don Pasar (2013)* kamedalang majeng ring sang sané ngwacén indik panglimbak ring Dénpasar antuk kruna-kruna pilihan, lengut, miwah ngulangunin. Yéning makakalih kasandingang, sinah pisan irika kacingak kawagedan para pangawiné nlatarang kawéntenan Dénpasaré antuk basa sané malianan inggih punika basa Indonésia miwah Bali. Napi ké basa sané mabinayan punika taler ngawinang wiraga miwah wirasané mabinayan? Utawi, silih tunggil miwah makekalih buku punika sida ngaturang miwah nyihnayang daging-daging kayun para pangawiné indik kawéntenan kota Dénpasar.

Dumogi bukuné makékalih puniki prasida medal taler prasida dados sesuluh indik sapunapi panglimbak ring Dénpasar. Wesananing atur, dumogi makekalih bukuné puniki prasida dados sarana mulat sarira miwah “*sumber inspirasi*” ring sang sané ngwacén mangda sareng-sareng ngwangun miwat ngemit Dénpasar pinaka “Kota Budaya Kréatif”.

Pamipil

Daging Cakepan

Sambrama Wacana Walikota Dénpasar	iii
Pamahbah	v
I Madé Suarsa	
Dénpasar Lan Don Pasar	1
Monang Maning	3
Car Free Day lan Car Everyday	5
Gedé Nala Antara	
Catur Muka	6
Agung Wiyat S. Ardhi	
Taksu	7
Tan Wénten Cihna Yasa	9
I Putu Ari Kurnia Budiasa	
I Luh Peken Badung	10
Ratu Tuan Baris Cina	11
Luh Yési Candrika	
Paksi-paksi Ring Padmasana Agung	12
Désa Bedelod	13
Déwa Ayu Carma Citrawati	
Dénpasar Sané Mangkin	14
Kebus	15
Gdé Dharna	
Puputan Badung	16
Ni Madé Ari Dwijyanthi	
Bet Ngandang	24
Blanjong	24
Uli Sanur Ka Peken Badung	25

Nyoman Tusthi Éddy

Terminal Ubung 26

Arca Catur Muka Dénpasar 27

I Gusti Putu Bawa Samar Gantang

Dénpasar Wawa Wéwé 28

Pakéwuh Dénpasar 29

Dénpasar 2013 30

Pandé Kadék Juliana

Saking Hati Sujati 32

I Ketut Aryawan Kenceng

Dénpasar Mangkin 33

Nasi Jénggo Lan Gajah Mada 34

Tukad Badung Mangkin 35

IBW Widiasa Kenitén

Tukad Balian 36

Karang Awaké Tandurin 37

Angripta Rum 38

DG Kumarsana

Batan Moning Nuju Monang Maning 39

Di Kota Dénpasar Kedisé Buung Mamunyi 41

Pasih Mertasari 42

IDK Raka Kusuma

Di Lapangan Puputan 43

Kota Palekadan 46

Malayar Sakéng Sanur 49

Gending Angin Dénpasar 51

Jalan Kamoboja Nomer 6 Warsa 1986 54

Kupu Kupu Pelabuhan Benua 56

Satua Modél Ring Bali Hotél 58

Nyoman Manda

Ring Pasisi Sanur	60
Perahu Wangkang Sri Komala	61
Yur Biur Pasisi Sanur, 1	62
Yur Biur Gumi Sanur, 2	63

I Wayan Mareg

Catur Muka	64
Sutindih	65

IB Surya Matra

Semeng Ring Pasisi Sanur	66
Dénpasar Mai Bareng Dini Negak	67
Semeng Ring Kota Dénpasar	68

I Wayan Paing

Kesiran Diorama Bajra Sandhi	69
Loloan Puputan Badung	70
Gagéndong Peken Badung	71
Tamiu Uli Tukad Badung	72

Ida Bagus Gdé Parwita

Das Rahina Ring Pasisi Sanur	73
Sanur, Ngawitin Galalang	74
Dénpasar	75
Panulamen Segara Banua	77
Catur Muka Ring Tengah Wengi	78

Ida Bagus Rai Putra

Jempiring Putih	79
Dénpasar Tuasing-Tuas	80
Dénpasar Mahatidana	82
Sanur Syaahrnuuur	84
Sindhu Sanur	85

IDG Windhu Sancaya

Ida Bagus Mantra	87
Prof. Bagus	88
Dénpasar Kota Budaya	89

I Madé Sanggra

Dénpasar Sané Mangkin	92
Dénpasar Sedih	93
Pasisi Sanur	94

Djelantik Santha

Taén Siat	95
Dam Oongan	96
Jukung Mabisak Uwék	97
Léak Sanur	98

Madé Sugianto

Sanur Kesiur Kesiur	99
Renon	100
Lawar Dénpasar	101
Malajah di Tonja	102
Lumintang Masunar Galang	103
Sesawangan Semawang	104

Raka Sukmadi

Surya Téja Kembar	105
Dénpasar Heritage	106
Puputan	107
Ijo Gading Carik Renon	108

Agoes Sutramama

Angen Dénpasar	109
----------------	-----

Putu Réland Dafincy Tangkas	
Dénpasar Masunar	111
Madé Réland Udayana Tangkas	
Jempiring Putih	112
Dija Ké Dokaré Jani?	113
Madé Taro	
Kembungan Angin	114
Don Camplung	115
Kacunduk Pan Jantuk	116
Tudékamatra	
Kunang-Kunang di Lumintang	118
Purnama Ba Duur Sanur	120
Catus Pata Catur Muka	121
Pura Jagatnatha – Muséum Bali	123
Putu Éka Guna Yasa	
Subak	125
Sakénan	126
Ni Kadék Widiasih	
Semaya Ring Wongaya	127
Gurit Ring Dénpasar	128
IGN Wiriawan	
Kertalangu	129
Ka Dénpasar	130
Pangawi lan Pamipil	131

I Madé Suarsa

DÉNPASAR LAN DON PASAR

sadurung manusané membah mlabar dénpasar
palemahan kota kantun asri binari
katah genah nandur wit sekar
makejit mangényor i kaki kusir dokar
ngateh muatan bajang mapotrék maklambi anyar
maénci barak ngékék masebeng jenar
motor pit jepit sepéda nyalip cikar
nyepud pasliwer selahé antar
ring bucun alun-alun sadina magelar
dagang ubad ida bagus rai lengar
mabusana rangda iteh ngadol ujar
dagang kacang kliut pangus kenyar klinyar
lais buka saplar
alit-alité nimpugin buah celagi sada bingsar
ten wénten braya masebeng sangar
tan wénten wayan buyar
tan wénten ngutah bayar
sami masemu égar
semu masemi sunar
amatra nénten tangar
mangupa jiwa ring kota dénpasar

sayan lingsir duh kota dénpasar
kalaning mangkin dados don pasar
tatujon sang ébeking dolar
pupulan wang wibuhing dinar
lan pasayuban jadma dura pitra kasasar
sami dados buyar
sami bedos kasar
raras asri doh matilar
pempatan agung dados pasar

pasar dados sebun maklar
ngawé biuta sadina goar-goar

palemahan ébek dados cupek
tan pegat pasliwer wargi ngebekin margi rupek
jagat maklepek opek
pikayunan puek
tetujoné tan nuke
kadi semut marebat marebut rahina wengi
sisi-sisi telajakan makulit beton matulang besi
tukad badung sané kasub ngid pangid
dados bangbang lulu lala-lulu alib
ngatuju sabeh masa
margi dados tukad nyalah masa
tukad dados segara
amunika rusak kotané mangkin
nénten sami kayun makinkin
mangda dénpasar mawali
lestari ngulangunin ati

ngiring sarengin pidabdab sri bupati
ngardi dénpasar luh sutrepti
palemahan pawongan parahyangan tata titi
sentana cucu waras paros sujati

redité umanis ukir
130604

(Saking pupulan puisi *Ang Ah lan Ah Ang*)

I Madé Suarsa

MONANG MANING

dauh ro ngruak macingcing
masuryak surya galak nyicing
panes cinging
tuh gaing tanah ngloping
keping kulit guling
makrupuk emping
toya tan karing ngranjing
napi malih ricing
langit kauh nriping masanding gading
bintang gumintang ngulanting
ring gegana ganting pasranging
dingin tan patanding
nyajah jajah rah tulang daging
lipan pasliab ngradab kalajengking
anak alit tan papegatan ngeling
krama miskin paling
kémaon tetep ening
éling
mapan polih galah masanding
mangda uripé matingting

mangkin luh iding
gesit enduh kadi toyan jading
palemahan srining-srining
krama miskin leleh kalilih kagiling
jerih nyamping
sampun katanding-tanding
jadma sugih géléng glalang-gliling
wong wibuh gendang-gending
kantong krincing-krincing
cinging

pongah ngancing

duh monang-maning
sampun mabading

anggara pahing tolu

171006

(Saking Pupulan puisi *Kunang-kunang Anarung Sasi*)

I Madé Suarsa

CAR FREE DAY LAN CAR EVERYDAY

Sabeh-sabeh yata panes banteng
Saking Budha Cemeng ngantos Budha Cemeng
Saking semeng ngantos tengah lemeng
Saking tengah lemeng ngantos semeng
Salaksa majeljel montor alit ageng
Ngebekin margi ngindeng-indeng
Gering magarang magerung Gerang-geréng
Maluab dot malaib ngacueng
Kémaon sami ngubeng kablengbeng

Amunika marginé linggah lémpéng
Metu cupek tur capeng
Montor bontok dawa neng apeneleng
Sami brangseng
Uat baong kenceng
Saling nengneng saling cureng
Saling peleng saling kampleng
Nigtig bél kemprang kempréng
Kuping empeng
Sirang pengeng
Kota dadi geseng
Hari saling pakereng
Numbas montor seneng-seneng
Yadiastun mael ngluang

Car free day kauleng
Ngindengang montor patut pitet kengkeng
Mangda Dénpasar sareng keneng-keneng

Car everyday sané maimbang
Nguyeng tempeh ring margi lemah peteng
Mangda Dénpasar mabading badeng

Gede Nala Antara **CATUR MUKA**

Mayoga ring catus pata
Ring pusering windu kuta
Tatah sangging tuhu mataksu
Pangaksiné tan patunggu
Tan wénten sané rungu
Tan putus tibénin lahru
Tan hana manah dudu
Tan obah setata awas
Lor kidul wétan kulon sami tatas
Tatas sahananing lumaku
Tatas sahananing ala-ayu
Ala keni kapastu
Ayu nemu rahayu

Agung Wiyat S. Ardhi

TAKSU

Rarianang indangé
Duh, Aruna,
duh pawana,
duh rahina.
Tityang ajerih
Widhi wadih
Kalantaka ngendih
Tityang amerih
Asing alih mangalih
Asing alih tan polih
Tan polih ngruruh ririh.

Mangkin, saking prabhata segara Sanur
Saraswati matéja
Nyinarang kaluihan Aji
Nyekarurayang kadiatmikan
Kapradnyanan
Ring sang teleb angulik sastra
Angulik aksara
Angulik tatua

Aruna, pawana, rahina
Sampunang malih andega indangé
Tityang tan kantun ajerih
Widhi tan kantun wadih
Réh Saraswati sampun nyiratang
Padma késara
Taksu
Nyekarurayang satwam
Ngébebin Bhuana Dénpasar

Mangkin, ngiring tancebang dupané masumpang geni
Ngendih
Mangda polih asing alih
Ngruruh ririh
Ngruruh sugih
Mabekel tresna kinasih
Mapikolih shantih.

Bhadrika Ashrama,
14 Agustus 2013

Agung Wiyat S. Ardhi

TAN WÉNTEN CIHNA YASA

Katur ring Iratu, Ibu

Ibu, iratu nyambahang wija kinasih ring jenyanan tityangé
Ngungkab peteng dedeté,
Ngukir arsa
Nyinarang widya
Muponin hita, nglambung ngambara
Nglimbakang shanti

Ibu, iratu ngendihang suar galang
Téjannyané tumus rauh ring bucu-bucu samar
Sané tan pantara nglikadin

Iratu sampun ngalgal lisiké nyibak segara
Rauh ring Nusa Apti
Tan enti
Tan lesu
Tindakané tan rarianan.

Yéning iratu lina, ibu
Puspa puspita kasturi cendana arum
Kasekarurayang mayasin layoné
Makukus dupa sarining acintya
Tangis kinasih nembangang kidung duhkita
Ngampakang dwara swargané kapendak apsari
Dulur semar pagulingan

Ibu, iratu déwan tityang
Saking garba nyambahang amerta
ring tityang, Dénpasar.

Bhadrika Ashrama
25 Juli 2013

I Putu Ari Kurnia Budiasa

I LUH PEKEN BADUNG

Luh tegtegang keneh iluhé
Saja mula idupé di kota kéweh
Ngajak pianak cerik-cerik
Ngungsi umah duur gunung
Tuun bukit nuju kota
Pakebyar lampu kotané
Kadi upas nyusup tulang
Da lénga luh!!!
Cara I dedalu sunarin sundih
Galang pabyayutan magarang galang
Pedalem luh,,,da bes mamaksa!!
Pedalem pianak iluhé
Idup di kota ento kéweh
Ngoyong di tanah apétak, cupit
Sisin Tukad Badung, buin romon
Magaé puntag-pantig
Nyuun urip, ngandong angkihan
Kalahin kurenan nyujuh tanah wayah
Padidian ngurip panak sentana
Saja,,saja,,iluh luih
Lautang,,,luh lautang!!!
Yasa kerthiné né utama
Idupé tusing ja apétak peken Badung
Nyansan maatang iluh mategenan
Suunané masi nyansan baat
Tegtegang kenehé, gedénang bayuné
Tiang dini manimpalin baan pabalih lan angob

I Putu Ari Kurnia Budiasa

RATU TUAN BARIS CINA

Ritatkala Sang Hyang Surya
Mijil saking wétan
Ring pantaraning langit lan pasisi Sanur
Pagrudug suaran pemarginnyané
Sekaa alit wong cina
Nanging lacur baya nibénin
Kapal nyané bencar kabencana ombak
Tan katulung,
Saking besakih ulung ring sanur
Tuah sisan belahan kapal kampih
Dek-dek lidek, belah benyah jukung njung
Belahan njung, dados blanjong
Punika sané uningin tiang!
Mamargi tan parasa lan tatujon
Ngantos rauh ring tanah landuh
Landuh, rena, raris metu renon
Nggih, punika sané uningin tiang!
Panugrahan Sang Hyang Widhi kuasa
Gemah ripah, sarwa mentik
Mawetu ngatos tan éling
Bekel tiang saking panegaran tiangé
Mas mirah intan permata
Sesakep gamelan agung
Berrr...lan burrrr....
Masuara nyusup ring angen
Suara sungu masuara ngumbara
Nundunin manah ksatria
Pangawit sasolahan agung
Pusaka budaya patitip sang pitara
Katur ring Sang Hyang Wenang
Ratu tuan baris cina

Luh Yési Candrika

PAKSI-PAKSI RING PADMASANA AGUNG

Pakebat kapid ipun i Paksi
Mandulamé ngulangunin ati
Mabulu antuk kanaka
Pada girang menyama braya

Makeber mangindang
Enceb ring jeroan agung
Pada nyiksikin bulu ngawé liang
Mligbagang karya ageng, gilang gumilang

Iriki ring padmasana agung pinados saksi
ritkala ngawindu Sang Hyang Ratih
sami mapupul nunas pangubakti
ngembasang pikenoh hning suci

Paksi-Paksi wibuh antuk kadiatmikan
cruat-cruit pada ngetohin jagad
pangawité ring genah agung, suci kota sujati
kadasarin antuk kapatutan ipun i Paksi

Purnama Badrawada,
Redité Pon Prangbakat, 23/6/ 2013

Luh Yési Candrika

DÉSA BEDELOD

Tatanduran ageng majajar mabaris
irika, ring tanahé sané paling lais
nandurin bias lan beton baang i turis
sampun mapanta-panta buina magaris
 sejatinné liu ada tukad
 nanging, yéh tukadé paling ngalih carik
 pajalané pada likad
 ngranayang yéh tukadé kaik-kaik
gumatat-gumitit pada mlaibin
tusing ada alas lakar tandurin

wong asli malaib ngalahin
wong jawi lega nongosin

Buda Kliwon Gumbreg, 20/2/2013

Déwa Ayu Carma Citrawati

DÉNPASAR SANÉ MANGKIN

DénPaSar SaNé MangKin...

Déning wong tambet

Pangawitnyané wantah desa

Sarwa taru dumun makéh iriki

Sané ageng tur madurgama

Nénten wénten wong sané wani

Mangkin kahanané sampun lian

Kincit wong uning sané wénten dumun

DénPaSar SaNé MangKin...

Dénpasar...

Patutnyané asri

Sarinné Pulo Bali

Sampunang ngantos karusak

Né mangkin sami mangda ngraksa

Mangda sawiakti

Kinkinang saking ati

Dénpasar, 10/10/2012

Déwa Ayu Carma Citrawati

KEBUS

Ené gumi kebus
Margané makudus
Montoré bek,mesuang andus
Semengan kanti peteng buka tambus
Awaké buka dusdus
Kénkénang tusing kebus
Carik linggah dadi umah satu
Alasé mabusbus tusing ada ngurus
Dénpasar né jani
Kebusné ngubek ati
Tusing krana matanai
Jadmané suba tusing ingat tekén Widhi
Iteh makupuk ngalih bati
Ingetang bli...
Sugihé tusing aba mati

Dénpasar, 10/10/2012

Gdé Dharna

PUPUTAN BADUNG

I

Damuh semengé mademang damar Sanuré
Langité sampun masawang barak
Daweg kulkulé katepak nyigit kiapé
Wadwané digelis ngungkab lawangan
Matakén ring kayun – tan wénten paruman
Suaran kulkul – suaran kayun karama
Suaran kayun kang diri
Sampun masikian dados urip
Nika mawinang sami medal
Saling takénin sareng sameton
Taler tan wénten sujati uning

Ring pasisir ombaké makidung
Nyanggra wadwané ngaksi sakunar
Dibi sandé kapastu batara Baruna
Ngengsut ring pasisir mabendéra Welandi
Sri Kumala druwén sodagar Cina
Kwéé TéK Tjiang sané kasambat

Wadwané sami uning
Tawan karang sampun kaanyut
Napi malih patut margiang
Yan tan nglaksanayang tatwam asi
Ngenjuhang asih ring sang sodagar
Kaicalan bawa kagebug ombaké magulung
Kadi bisbis kamudiné ombaké mabalik

Punggawa Sanur ngalebar baos
Mangdén wadwané nyadia mangebaga
Dosa yan malaksana corah
Maling barang ring tengah kapal
Sami sayaga nampi pangandika

Ngebag perahu wangkang semeng lan dalu

Ombak Sanuré tan sida kauduh
Nyarengin asihé ring pasisir
Ombaké sayan magunung-gunung
Ngebug sakunaré masibak-sibak
Bangkén nyané kagampilang
Ka Désa Béaung tan doh ring Sanur

II

Kwéé TéK Tjiang luas ka Buléléng
Nangkilin Residén Bali lan Lombok
J. Éschbach ring Singaraja

Saking iriki satwané kaulat
Kasekarin kembang lading
Kasiratang ring tanah Badung
Ambuné pengit manusuk manah

Aturé banban ngawelas asih
Nyané kagantung ring matané kupit
Ngaturang kapalé kampih ring Sanur
Barangé kajarah ring pasisir
Wadwa Badungé mapatuh daya
Tan sujati nyadia mangebag

Résidén nampi aturé pangus
Dané uning kijapané tuh
Nyimpen naya ring bongkol kemikan
Karasa tan yukti raja Badung megat subaya
Napi malih mapatuh daya sareng wadwa

Ngaruruh kasujatian atur
Kontrolir Schwartz dados utusan
Raja Badung tan kapanggih
Punggawa Sanur kanampekin
Nyaratang parindikané jati

Ombak Sanuré pinaka saksi

Sinah sampun selangé mabukti
Atur Cinané wantah kakawian
Tatujoné mapikolih bati
Mangdén Raja Badung manyangkol pocol
Akuwéh ajin kapal lan gaji para kelasi

III

Sampun suwé kanjantos indiké puniki
Gubernur Jénderal Van Heutz girang ring manah
Polih jalaran ngalepit janji
Sané kasurat 13 Juli 1849
Daging nyané sampun sinah
Gubernur patut nyungkemin awig Baliné
Ngamanggehang kawibawan para agungé
Punika kocap tan patut lanturang
Duaning lémpas ring daging awigé
Sané kamargiang sajabag nusantara

Sri Kumala kaanggén anjan
Kwéé TéK Tjiang kasadekin
Ngésgés Badungé naur kapocolan
Nyerahang jinah sodagaré kupit
Pitung tali limang atus rupiah tan dados kirang

Gusti Gdé Ngurah Dénpasar
Agung Badungé mawibawa
Benduné kasimpen ring méru sarira
Kadi borbor kayuné miragi
Pinunas juragan Sri Kumalané
Kapatutang malih Résidén Baliné
Premangkin sida ngandapang iketan sawitra

Tan sida panjang ngandika
Pinunasé tan mantuk ring kayun
Rarisang lanturang ring tuan résidén

Badung tan pacang nagingin
Yadiastun akéténg bolong
Aputih kuku tan marasa salit
Napi malih corah ring gubernemén

Utusan mawali ka Dén Bukit
Ngandong puyung ring duur kapal
Unteng manahé sampun macihna
Raja Badung tan pacang nagingin
Larapané sané katunas

IV

Van Heutz nuncapang ngalebar naya
Agungé ring Bali sami katangkilin
Mangdén kayun maing Badungé
Rurung dagangé patut empetin
Pasar Badungé mangdénnya mungmung

Klungkung, Tabanan méwéh kabelat
Saud pangandika sampun janten
Salulung sabayantakané dados unteng
Duk panglingsiré kantong ajeg

Rurung dagangé tan sida kabendung
Lawat batiné ngicalang takut
Nyilib manguak pagehané pingit
Ngawinang i welandi dukané nadi

Kapal-kapal sami kagelar
Miyak sagara Badung, Tabanan
Manahé kaanggén patakut
Badung, Tabanan tan magejiran

Sayan maleging corah Welandiné
Laksanané ngukir dadalan
Tingkahé léak némblék
Ngulik jalaran ngentungan wéci

Tatujoné wantah nunggil
Awig gubernur jénderal mangdén mamargi
Sajebag nusantara
Agung Baliné wenang nginutin

Pocol perahu wangkangé kapayasin
Kaoncérin béa kapalé matakut
Patut kataur tan dados kelidin
Yan yukti Badungé ngamenggahang sawitra

Gusti Gdé Ngurah Dénpasar manyungklit keris
Swabawané bag kadi langité ring wates soré
Bayu premanané ombak kaulu pasisir Sanur
Baudanda lan punggawa sami sayaga
Nyangga sadripuné pacang rauh

V

Van Heutz nyaliksik galah sané anut
Nglaksanayang brangtiné sampun mabukit
Negen kimud kalih warsa lintang
Tan sida ngendukang jagat Badungé
Tangkeng, kulit banténg alas Baliné

Pamuntat utsahané managih pocol
Sampun katanem ring dasar sétra
Kaurug bungkalan gunung agung
Tabuh gendér sampun bebatélan
Damar gantungé kaminyakin
Raksasané ngelur mamegat ombak

Roras Septémber 1906
Suryané kantun mengkeb ring bukit nusané
Kapal-kapal welandiné majajar
Magehin ombaké ka bibih pasisiré

Duang tali telung atus roras serdaduné seregep

Pitung atus petang dasa siki mandor lan kuli
Nyantos perintah pangliman perangé
Mayor jéndral Rost Van Tonningen ring kapal both
Mapaiguman sareng pangabih
Ngétang dauhé pacang nedunang balané

Ombak Sanuré saling maluin nyujuh pasir
Masuryak kawedar anginé nyirsir
Ngawangun semangat para prajurité
Mabéla pati ring nagari
Bakti ring pertiwi

Suryané sampun sondoh ngauhang
Panasé sayan ngendukang
Utusan tedun nangkil ka puri
Daging aturé mabantang asiki
Mangdén i ratu naur kapocolan Cinané
Kaimbuhin béa sané sampun kawedar
Mawates wantah kalih raina
Yan tan kayun bedil pacang mabaos

Akidik tan goyah ngagem swadarma
Pageh ngajegang kaagungan jati
Wibawané kasungsi ring muncuk gunung
Citané kagantung ring garis langit
Durhakané kajantos ring muncuk keris

VI

Empat belas Septémber 1906
Wates geraké sampun ulung
Serdaduné katedunang
Sanuré kaanggén pangancan
Ngambat yudané ka nagari
Mabaris balané ngebag désa

Semengé kantun matekes damuh
Ngundap serdaduné ngalébang damang

Wenginé mategul takut
Prajurit Kuta lan Badung nagari
Nganyudin musuh kadi balabar
Kapapas bedil keplugané ngawag
Siat dadakan serdaduné cengag
Mimis meriyemé kasambahang
Nambakin prajurité masuryak lantang

Satian wadwané kasandegang
Mawali ka tepi nagari
Hujan mimisé kakelidin
Saking kapal meriyemé kautahang
Puri nagari kapipitang
Dénpasar, Pemecutan kapucukang
Ngayomin serdaduné ngentungang tindak
Mirig Kesiman ping ajeng kauwak
Kanggén titi nungkangin kota

Saking abian prajurité nyerit
Nibakang keris ngentungang takut
Serdaduné yatna manyangkil uyah
Ring tanah Jawi sampun kaemban
Élah mamedil makebat angob
Kaperwiran wadwané satia sujati
Tulus bakti ring ibu pertiwi

Tan suwé Kesimané runtuh
Puyung puriné taluh tan pasari
Sami magingsir ka Dénpasar
Ninggal sawané magetih-getih
Madugdug ring abian-abian

VII

Duang dasa Septémber 1906
Bola apiné maunda-unda miyakang angin
Nyujur puriné sinah puun

Langit Badungé kaliput andus
Ucem swabawané ngukirang wangsit
Serdaduné sayan nalesek wates kotané
Keplugan bedilé saling sautin
Meriyem lilané tan sida nambakin
Tungkangan welandiné ngiterin puri
Sarat manahé pacang manangkep
Agung Badungé pancéré kukuh

Sepin puriné nyimpen subaya
Satiané karoncé mabenang tulus
Lawangan agungé kicalan lait
Kakilit wastra putih-putih
Lanang istri, lingsir anom mapayung keris
Medal tan pasuryak manyujur musuh
Tabuh kayuné pulung pastika
Ngukuhang satiané sujati
Puputan... puputan...

Aji langit ibu bumi magejeran
Nampi pawalin okané sami
Makangpuh baktiné ring nagari
Ngarajegang wibawan Baliné jati

Ring pretisentanane mangkin
Taler sané pacang rauh
Sampunang lali ring Badungé nguni
Muputang aji antuk puputan
Mangkin Badungé nyantosang
Indayang takénin ragané
Napi sané pacang kaaturang?!

Ni Madé Ari Dwijyanthi

BET NGANDANG

Wiréh,
tusing ada seken rungu
ané bet lan ngandang
ento Bet Ngandang

BLANJONG

Sané engsap
Lan kaengsapang

Ni Madé Ari Dwijyanthi

ULI SANUR KA PEKEN BADUNG

Tiang tusing lakar mekelid
krana dini mula tiang ngalih idup
apaké anaké ngorahang
entungin tiang aji kuping bongol
 idup tiangé ben ngindang
 ngindeng kema-mai ngalih ané belus
tusingké nawang?
apaké ané belus ento?
 cawis tiang padidi
ané belus to, ané setata ngaé tiang maaduhan
ané belus to, ané setata ngaé tiang mataagan
ané belus to, ané setata ngaé tiang nigtig awak, nyambak sirah
ané belus to, ané setata alih tiang ngindeng, ngindang kema-mai
 uli bucu kanti ka bucu
 uli semengan nganteg semengan
 kanti sirah tiange tusing marasa sirah
 kanti tiang nyelepetag baan kenyelé, di bucun pekené.

Nyoman Tusthi Éddy

TERMINAL UBUNG

Iriki genah nyakenang lesuné
Nyujur désa, ngumbang pamarginé
Sukeh yukti ngararianang tindakané
Masa tan séla ngaonin marginé

Iraga mula nénten nuwé genah matinggah
Kadi paksi kekelik setata osah
Kakedeng antuk pamargin karma
Setata nguber gena dama

Pamuput mawali kabongkol
Ring asapunapiné mawuwuh pocol

Nyoman Tusthi Éddy

ARCA CATUR MUKA DÉNPASAR

Siang dalu anyaga baya
Maangga arca paras sekala
Nanging maguna lingga
Caya Déwa di niskala

Si kauh mabejor margi utama
Gajah Mada
Pacepuk sarwa jana ngunduh karya
Suka sang sadia, suka sang daridra
Patemon darma, arta, kama

I Gusti Putu Bawa Samar Gantang

DÉNPASAR WAWA WÉWÉ

Kubu majalan
Pasliur patikaplug mugpug
Ngeliur lepug
Mubu di pempatan
Sasambat di jalan ramé
Patikalé wawa wéwé
Pasisi kasa kisi
Ngintip matan ai
Medem bangun
Jangkutin angin puyung

Tabanan, 2 Méi 2012

I Gusti Putu Bawa Samar Gantang

PAKEWUH DÉNPASAR

Tukad mabunga lulu
Lulu mabunga luluh
Luluh mabunga luh
Luh mabunga aluh
aluh mabunga pakéwuh

Tabanan, 15 Méi 2012

I Gusti Putu Bawa Samar Gantang

DÉNPASAR 2013

Warsa anyar langité ngalgal
Santukan alasé balbal
Tukad telabahé belbelan
Jlinjinganné sampetan
Lulu ngambet bet sebet
Aad aud luluh
Aas nyauh kreteg
Aang iing tiing ligir
Makejang sanglir makejang sengir
Carik rikrik tegalan liglig
Kulak kulik kulak kulik kélangan umah
Kakelik sesambat ngeling ngukir langit
Jelun iaké ngelimbak
Iwaké sengal-sengal
Makejang saplar amah dollar
Tan ngelah telajakan jalan
Tan ngelah telajakan tukad
Pariwisatané mamata bhuta kala
Idup kaé mati iba
Ajak nyama macongkrah warisan
Ajak wong neka néka-néka
Dénpasar 2013 sayan ngeraméang
Bromocorah ngangsan ngeliunang
Léak lemah sundel tanah makalé
Kafé, bungalow, homestay, vila lué
Dadi sebun HIV/AIDS
Grapa grépé ngejotan bangké
Sang kuasa wawa wéwé
Sang pangutsaha ha ha hé hé
Dénpasar 2013 sarat invéstor! Kepongor!

Dénpasar 2013 gorgor bikul gondong!
Dija lemahé tan pamatanai
Dija petengé tan pangipi
Dija regajiné tan pagigi
Dija langité endep ditu bhutakalané kedék
Ingetan madéwa di pura, maratu di puri, mabui di tangsi
Ingetan ya bhuta ya Déwa ya Rwa Bhinéda
Ingetan onyo lakar mati
Ingetan ngrestiti Ida Sang Hyang Widhi Wasa
Apang makejang sidha sadhu santhi santha

Tabanan, Buda, 9 Januari 2013

Pandé Kadék Juliana

SAKING HATI SUJATI

Niki tutur i raré dibi
Pangkah ngucap ngajum sang niti
Sané ngamong jagat Dénpasaré niki
Uli nguni kanti jani
Mugi sida kadi kaapti sami.

Witnyané saking hati
Pratingkah dané pinaka bukti
Hyang Widhi pinaka saksi
Wantah tresnané ngalebur iri
Pamucuk idep pinaka sari
Ilang krodha pinaka ciri
Jagat gemuh sida trepti.

Dasaré hati dharmané pikardi
Papineh pangucap lan parilaksana suci
Dharma agama dharma negara nunggal siki
Bani ngetoh pati mélanin gumi
Gumanti jagat Dénpasar sida ajeg lestari
Kapupuk tresna saking hati sujati.

I Ketut Aryawan Kenceng

DÉNPASAR MANGKIN

Mlegpek nganangning
Matan ai galak nyicing
Margi ngangsan cupet
Dini ditu macet
Buk masepuk
Aspal makupuk
Béll montor ngempengan kuping
Démpét pasliwer selang seling
Griyang magriyung dadi buyung
Lemah peteng atep gerang gerung

Tegal carik asah kaplasah
Makudang kudang cutak pucah
Dados toko lan umah
Dados hotél lan villa méwah
Sarwa makenyah
Para jana sami ulap ring rupiah
Mucukang basang begah
Tanah tetamian kaadol telah
Anggen ngulurin manah
Manah rajah gamah

Dénpasar riin
Dayuh srining srining

Dénpasar mangkin
Kebus nguyang aying

I Ketut Aryawan Kenceng

NASI JENGGO JALAN GAJAH MADA

Ngawit warsa pitung dasa riin
Kantos mangkin
Kantun ngenyudin
Kantun ngedotin

Ajengan sadarana
Wantah samatra
Nasi jinggo jalan gajah mada
Tan tuna rasa tan tuna arsa

Cerik kelih ngebekin margi
Kalih unkus tigang tali
Keled makébék lais lantih
Mén srimpeg kenyung mapikolih

I Ketut Aryawan Kenceng

TUKAD BADUNG MANGKIN

Membah badeng madidih andih berung
Maid luluh lulu tain bangkung
Beboso nyalian kekeh Awakné kembang
Uyak tuba limbah sablon kalangkung
Parajana mati buta bongol lan pengkung
Tan rungu tan pa semu ngulah aluh ngentung
Tukadé bengu mangkug tan kari luung
Cerik ceriké tan kari girang macemplung malalung

IBW Widiassa Kenitén

TUKAD BALIAN

sungkan ?

matamba ring tukad balian

irika wénten usadha tanpasurat

mawasta usadha punggung

sungkan ?

matamba ring tukad balian

irika wénten tirta tanpaaksara

mawasta tirta sunya

tirta ening ening tirta

IBW Widiassa Kenitén

KARANG AWAKÉ TANDURIN

: Ida Pedanda Madé Sidemen

ring tuntunging pangrupak
ngupak sastra sunya
ngruruh suaraning sepi
sastra tanpasastra
munggu ri hredaya
ngurip jagat ngurip angga
magenta pinara pitu
mamuja hyang tuhu

IBW Widiassa Kenitén

ANGRIPTA RUM

: Sang Mustikaning Sastra

surya saking Sanur
mucehang idepé lamur
mangda sampunang nglantur
napi malih ngawinang samur

teping aksara Sanur
ngulik samudra sastra
tyaga ring angka
kamahatmikan sidha tedun
anggén tedung angen
ngulati rum
ngulat kalangon
sidha amor ring Acintya

DG Kumarsana

BATAN MONING NUJU MONANG MANING

Uli Batan Moning ngalih dagang saté
 Ngantiang tumpangan di penambangan suci
 Kondén ada taxi buka cara jani
 Lamun sing maan negakin bis Gitabali kel sing nyak luas mulih,
 kéto luh masaut
 Nah dini merérén malu sambil ningalin dagang lotré : nomer
 buntut magantung di kiosé
 Dugas ento liu anaké ngadokang nasib baan milih milih angka
 Nyén nawang!
 Nepukin agét
 Ngayalin nasib mayah tiwas, lamun nyak juari pesu angka
 kesugihan
 Lakaran suud bli nyewa bis tumpangan di penambangan suci nuju
 mulih ka désa
 Uli rantauan gumi Badung
 Batan Moning taen masé ngecagang keneh
 Kuangan pipis lasia nganggeh di dagang nasi mén Wali
 Sing ade super markét cara jani selianan kén warung batan tiying
 Anaké lingsir madagang kacang negak sabilang peteng medamar
 saru ngantiang anak mabelanja
 Nekom ia di bucun marga kayumas sambilanga nguntul
 Pebalihe jak dokar tur jarané gapi mejéjér ngantiang penumpang
 Tondén ada cineplék cara jani lamun perlu hiburan kanggoang
 nyongkok di alun alun puputan Badung ngantiang kelir mekebat
 melawat sunar proyektoré : pilem koboi nyelek cungguh jaran
 Sing taén med bakat pebalih
 Kondén ada pilem satria baja hitam, Doraémon cara cerik ceriké
 pebalih jani
 Batan Moning nuju Monang Maning ipidan pragat baan dokar

neked
sing telah telah ngecagang kenangan
Dugas I luh ajak bareng lacur, uli pida lega
nganteg jani

DG Kumarsana

DI KOTA DÉNPASAR KEDISÉ BUUNG MAMUNYI

Taén ningeh kedis buung mamunyi lan metinggah di carang
Bungut kota Denpasar, punyan punyan asem majéjér makejang
bah

Maganti baan punyan beton, carang ngalih pipis

Peteng lemah maadukan

Cariké ube dadi jalan by pass lan tukadé jani sing ngelah selah
tongos yéh membah

Patesné adanin got tongos mesahin penganggo

(lamun enu ada got kedas)

Sempéda di marga protokol kapah mentas, ube liu uyak motor

- Sempéda jéngki jani sing kanggo!

Apabuin udara semengan abot baan oksigén

Kénkén sing kabibilan dadi gangguan keséhatan, sesek napas tur
rawan asma bronchitis

Oksigén kuang isepa baan asepa knalpot montor

Jalané nyerit montor mekalukan

Mekita nyebrang batisé payu ngetor

Taén dingeh kedisé mamunyi lan metinggah di carang

Kénkénang kal metinggah

punyan punyan telah tastas

Maganti baan gedung gedung metingkat

DG Kumarsana

PASIH MERTASARI

Tengahin ning segara tengahan ombak
ngembak
recek nyali awinan sunia ning segara
ngetohin smara sing gugu, ngelur kalara-lara
sekancan karirihan ngawi sang paparikan
sang taksu

ngerajah aksara
ngengsut lawatné
magulungan ka tengahan ombak

minekadi leluhur sumangsaya margiang kekawin
suaran ning galir

nyilatin langit smara

langitné

nyujuh smara

di

langit langit tutuk layah
bungkulan tata munyi buung pesu
sambrag mabrarkan di keneh
munyin kenehé sajan beneh
lan mai singgah
ning segara : tuah ngetohang rasa

ngelut lawatné

--di

pelawangan

IDK Raka Kusuma

DI LAPANGAN PUPUTAN

/1/

di lapangan puputan, Lirang
sabilang peteng tiang ngantiang
negak di tanggunné ané paak tekén trotoaré
kanti endag suriané

buka ané suba-suba. lakar ajak ngraos
kanti poosé pakecoscos
ngraosang démokrasi
ngraosang suksési

makenyat-kenyatan uat baong
sing ngrunguang anaké ngrunyang
mabalih iraga. kitak-kituk, bingung
sing ngrunguang kuluké ngongkong

Lirang, Lirang, Lirang
sesai, sesai tiang ngantiang

/2/

ada anak ngorahin tiang
idéwa sing luas nganging kaluasang
ka tongosé sepi jampi
di wawengkon Sukabumi

koné yén suba di tongosé totonan
malipetan sing nyidaang
krana yén suba di tongosé totonan
ilang, ilang sekayang-kayang

ané ngorahin takonin tiang
tongosé ento dija
anaké totonan seming nadaksara
ngejer ngraos: da nakonin tiang

laut magedi. nu seming muané
nguntul majalan. enduk tindakané

/3/

ada buin ngorahin tiang
idéwa sing ngilang nanging kailangang
sig tongosé silib lan ilid kasaubang
buka nyaubang saang

koné ngalih tongosé ento kéweh pasaja
buina, koné, salantang rurungé kema
jagain singa, jagain buaya
jagain macan, jagain raksasa

makejang galak kabinawa
apa liwat sarapa
bésbésa satondèn amaha
tulangné mabrarakan depina

mara tiang ngorahang lakar kema
tan pasangkan gagéson magedi ia

/4/

Lirang, Lirang, Lirang
sajaan idéwa kaluasang?
sajaan idéwa kailangang?

petengé dibi, dugas nlektekang bintang
inget tekén idéwa, patbelas tiban ané lintang

girang ngraos: démokrasiné lakar menang
suksésiné lakar kalaksanaang

tiang matakon: menang kénkén?
kalaksanaang kénkén?

suud kedék ngraos idéwa
sang kuasa ané meled aidupan kuasa
ané maparisolah danawa
lakar suud ngisi gumi
énggal, énggal lakar maganti

/5/

petengé jani suud nlektakang bintang
diastun suba tengah ratri
diastun dinginé tan kadi
di tanggun lapangané paak tekén trotoaré tiang nembang

Lirang, Lirang, Lirang, nu tiang ngantiang
kapining idéwa tiang lakar ngorahang
démokrasiné jani, kema-mai
ngampehang upas merajah bebai

sang angawarat ané gugu kaula kuasa
di subané suksésiné liwat
jejeh, jejeh setata marasa
jejeh tekén lawat aéng angkrag-angkrag joh sawat

demen gati atiné yén idéwa teka
ngraosang dini kanti endag suria

/2008-2012/

IDK Raka Kusuma

KOTA PALEKADAN

/1/

tiang, idéwa, mapasahan
tongosé majohan

surat ané ngranaang paak iraga
diastun pasahang makudang-kudang segara

sig suraté abulan ané liwat
magatra idéwa: di Prancis
makejang melah, makejang malengis
makejang makenyah, ngulapin paliat

baan gaguyon tiang ngwales: awanan
lipia tekén Dénpasar pinaka kota palekadan

ituni nélpun idéwa: kota palekadan?
apa ento kota palekadan?
ané tawang tiang tuah kota préman
tuah kota préman!

/2/

negak di ampiké. nlektekang bulan
marawat unduké pidan

peteng dugasé ento. bulan Méi
idéwa teka. muané barak gati
gedeg pesan. ngraos tan parérénan
kota préman! kota préman!

nélpun idéwa buin maninné
ngorahang di kapal pesiaré
ané nylajah segara
ngorahang kenéhé dukita

/3/

di ampiké. majujuk. nlektekang langité masunaran
buin marawat unduké ipidan

di subané makelo sing teka
ngirim surat idéwa
magatra: jenek di Paris
sig guminé setata ngesiuhang bo manis

sekat ento: tiang, idéwa
ngutus surat pinaka duta
sekat ento: tiang, idéwa
saling kirimin surat, setata

isin surat idéwané: tan mari
ngorahang dukita tan kadi
dukita ulian sakit ati
tekén kota palekadan pedidi

/4/

masalah di sendin ampiké. nlektekang remawa maoyagan
marawat idéwa majalan
paliaté nrawang sawang
tindakan idéwané gancang

matakon tiang di keneh sarwi nyusutin poos
buin lakar magedi idéwa
nyujur sajoj-joh tongos
megat makudang-kudang segara?

aidupan nongos ditu idéwa?
aidupan sing mawali mai?
aidupan nandang dukita?
aidupan nyakit ati?

kota palekadan iragané luung suba jani
lakar orahin di kacunduké dini
jumlah, di jalan Surapati

/2008-2012/

IDK Raka Kusuma

MALAYAR SAKÉNG SANUR

: Ida Bagus Rai Dharma Wijaya

/1/

malayar sakéng Sanur nglintangin segara Rupek
toyané ngléncok riantukan segarané kebek
nyujur puloné punika
pulo becik macaya

ombaké, ring sapunapiné mapiakan
ring sapunapiné mancaban
lancuté, ring sapunapiné jukungé namplig
ring sapunapiné tan mari namplig

liang magending i bendéga
pulo becik macaya
sampunang sayan ngadohang
nampekang ragané, nampekang

malih magending i bendéga
mangda gelis kacunduk sareng idéwa

/2/

anaké sané sareng malayar makidung
sang nuénang segara agung
pajalan prauné puniki tunas mangda lanus
sampunang, sampunang kantos papas linus

titiang sareng taler makidung
sang nuénang segara agung
prauné puniki sampunang kantos kiterin
toya makulekan banget pincerang angin

aksi sareng sami, garjita nganika bendégané
mangulayang, mangulayang paksi segarané
cihna ten kapialang pamarginé
cihna rahajeng pamarginé

titiang, anaké sané sareng malayar, makidung
suksma, suksma sang nuénang segara agung

/3/

sayan nampek pesisiné
sayan kelap-kelap puloné
kadi kelapan sunaran téja
sunarang meka ageng kabinawa

dewa ratu! duk ngenjek biasé
anget pramangkin ukudané

puloné puniki
cayané ngulapin gati
puloné puniki
banget ngangobin ati

manahé jenek deriki kantos nincap sunia
nanging kadadosang ngenahin ten lintang ring araina
sané dados jenek wantah sang maraga sukla
langgeng mabrata, langgeng mamona

/2008 – 2012/

IDK Raka Kusuma

GENDING ANGIN DÉNPASAR

:! Gusti Ngurah Jaya Negara

/1/

sampunang jeroné matakén
mémén tiangé sira
sampunang jeroné matakén
bapan tiangé sira

sampunang jeroné matakén
lekad tiangé ring dija
sampunang jeroné matakén
gedén tiangé ring dija

sampunang jeroné matakén
dados ngumbara tan mari
sampunang jeroné matakén
sané rereh tiang napi

sampun pakardin Widi manawi
kawéntenan tiangé sapuniki

/2/

sampunang jeroné nganikaang
nganggoang kita tiang ngumbara
sampunang jeroné nganikaang
sakita-kita tiang ngumbara

nuutang kita yukti tiang ngumbara
kija makita marika ngumbara
sakéng semeng kantos sanja
sakéng sandikala kantos endag suria

apisan biana wadih marasa
diastun tiang ngumbara
makudang-kudang warsa

nuutang kita yukti tiang ngumbara
durung naen ngangoang kita
durung naen sakita-kita

/3/

yéning jeroné nakénin
tatkala ngumbara sapunapi tiang
jagi aturin, yukti, jagi aturin
becikang mirengang, jero, becikang

ngumbara ring ambara
mangulayang tiang marasa
ring betén sami kanten alit
sané ngendih kanten makenyit

nempuh hyang bubu magumpluk utawi sambeh
tiang marasa tis pisan
napi malih nempuh sabeh
kadi téngkobang tan pararian

sakéwanten, ibuk manah tiangé
yén ngumbara ring tanahé
buk makupuk tan mari
awak tiangé jero, makaukud daki

/4/

sapunapi tatkala ngumbara nglintangin kota?

dalé siang jero, panes bara karasa
anak mabaos piragi tiang tan mari
panes jagaté, sané ngranayang napi?

piragi tiang taler
munyi gerang-gerung sliwar-sliwer
tan mari, pegat nyambung
mamanah tiang: méwéh deriki ngrereh suung

duk ngumbara ngalintangin désa
wénten jero, wénten sane sebetang tiang
pakanten bangketé sayan nguredang
yén telas, pantuné tandura ring dija?

sampunang mitaenang tiang nakéang
klebehé ngumbara dumunan ngujeg tiang

/2009-2013/

IDK Raka Kusuma

JALAN KAMBOJA NOMER 6 WARSA 1986

: IDG Windhu Sancaya

/1/

semeng duk punika.wénten nakénin titiang
kija jero, kija paksiné deriki
pakeburbur napi ilang
napi padem sampun makasami

titiang matakén : paksi napi
dané masaur : sakancan paksi
nguci sakéng ngawit galang badangin
kantos muncuk jepuné ainé nyunarin

sang mapitakén raris mamargi
sarwi ngandika : wénten lilus deriki
empak sami carang jepuné
patut aukud ten kanten paksiné

ngrémon titiang ring ati
anaké punika punyah manawi

/2/

tengainé ton titiang lawat jepuné
cedang kanten ring natahé
kadi katémplé kang ring tanahé

ngrémon malih titiang ring ati

sira sané matakén nuni?
dados sami nikaanga empak carang jepuné?
dados telas nikaanga paksiné?

jegjeg kanten carang jepuné
layak-layak tempuha ring anginé
akéh kantun kanten paksiné
nungkalik manawi cacingakné?

duk minggek kauh suriané
ulap-ulap daun jepuné
akéh pisan, akéh pisan rauh paksiné

/3/

ritatkala wengi, usan paksiné nguci
sepi jampi mangkin ring genahé puniki

piragi titiang, ring dija manawi
anak lanang sinarengan matembang
yén nguci paksiné raina wengi tan mari
bagia, bagia manahé sakayang-kayang

titiang nimbalin nanging ring ati
bagia, bagia titiang raina wengi
nyadia ngijeng kantos kawekas deriki
ngijeng ring batan jepuné magending tan mari

makenyem titiang duk makesiur anginé
miragi lanturan tembangé: yén langgeng raris endag ainé
tur setata, setata guminé galang
sapunapiang matembangé nyabran wengi, sapunapiang?

/2008-2012/

IDK Raka Kusuma

KUPU KUPU PELABUHAN BENUA

/1/

sakéng nuni mirig pesis
idéwa pacang nglintangin segara?
mrasidayang, mrasidayang jagi?
linggah segarané, linggah kabinawa

anginé baret pisan
midep doh ampehanga idéwa
anginé baret pisan
kampid duéné tan urungan caplus antuka

tan pakampid mrasidayang
mrasidayang idéwa nglintang?

cingakin! sayan ngakéhang gulemé
cingakin! sayan nebelang gulemé
sinah pacang bales sabehé
mabriok sakéng langité

/2/

toyan segarané cingakin, sayan magaburan
ombaké cingakin, magrudugan tur magulungan

kapal sané saraina malayar
ring dermagané majajar
glibag-glibeg tamplig gebiuran toya
talin jangkarné maoyagan mriki-mrika

jukung sané saraina malayar
ring duur biasé majajar

klipak-klipek keni tamplikan toya
talin bidakné maontélan mriki-mrika

nyeh, jekeh nakhodané nylajah segara
nyeh, jekeh bendégané paid angin baret
nyeh, jekeh, sabehé tan mari neet
raris tangkeb toya tegeh pasaja

/3/

kupu-kupu pelabuhan Benua, mimi
kantun, kantun idéwa mirig pesis
kedeh pisan kayuné nglintangin segara?
sampunang, sampunang déwa!

galahé kantun panjang
kantun wénten bénjang

cingakin! saling sander tatité
pirengang! saling sautin kerugé
cingakin! mabalapan sabehé
pirengang! banget pisan koosané

Déwa Ratu! ten rasaang idéwa manawi
sayan baret anginé? kantun, kantun idéwa
kantun mirig pesis
selametang ragané. gelisin, gelisin makaon déwa!

/2009-2012/

IDK Raka Kusuma

SATUA MODÉL RING BALI HOTÉL

: *A.A. Rai Iswara*

/1/

Andrei Voznesensky nyatuain titiang
wénten punyan lilak majalan
bongkolné peteng muncukné galang
akah miwah doné magejeran

ngauhang majalan sadurung nganginang
ngalérang majalan sadurung ngelodang
ngalérkauhang majalan sadurung ngelodkanginang
ngelodkauhang majalan sadurung ngalérkanginang

nyabran matindakan punyan lilaké
magojodan langit minakadi jagaté
daging langité maoyagan
daging jagaté maoyagan

majalan ipunyan lilak, majalan
majalan tan parérénan

/2/

malih Andrei Voznesensky nyatuain titiang
matanai ring muncuk punyan lilaké
miwah bulan ring bongkol punyan lilaké
sunarné nemu gelang

kruyuk ayamé saling tembungin
ring muncuk punyan lilaké
munyin clepuké saling sautin
ring bongkol punyan lilaké

nembé ngantenang lemah miwah wengi
ring genahé asiki
yadiastun lemahé duuran
wenginé beténan

nembé ngaton lemah miwah wenginé majalan barengan
soléh. akidik nénten kanten magejeran

/3/

titiang matakén: punyan lilaké kija mangkin?
ipun ilang, Andrei Voznesensky nyaurin
titiang matakén: kija ngilang?
nyapliir pasaut ipuné: satuané lanturang tiang

pirengang, Andrei Voznesensky nganika
duk nyeleg ring arep tiangé
bah ipunyan lilak nadaksara
sayan pured jeleg ipuné

ipunyan lilak, Andrei Voznesensky nganika
risampuné amul dangul jagungé
nabung ipun, nabung nadaksara
tan pasangkan macelep ka tangkah tiangé

raris Andrei Voznesensky ngédéngang tangkah
ton titiang gambaran punyan lilak bah

/2009-2012/

Nyoman Manda

RING PASISI SANUR

bulan Septémber 1906

sang surya medal saking tepi siring segara kangin
alon blanban sayan ngancan kadandan
atugel kendel ngigel di bibih angkasané luih
barak ngakak nyibak langit enggang langlang
liang angalayang
kasayut suaran ombak sumeriak
anggit gita kawula segara

ngateplés ngeplés tan pegat tetanjekan buih-buih putih
kaklentingan gender bias angalun-ngalun
kapak-kapak gupek pasisi nampak lelangunan
maulap-ulap slépan gadang matandang-tandang
saseriutan angina ngesir di pasisi
kadi tetabuhan gong abarung
megarang kidung sekeha pepanggulan dayung
ngungsi gaguritan paksi-paksi pasisi
pasisi Sanur
gemuh landuh lan luhur

suaran ombak masulingan angucap-ucap
pemargin sang bendega ngandong pencar dungki dayung
nyanggra segara
natar binar-binar nganggar urip sang omang-omang
uyang marinyang
pasisi Sanur
sang bandega ngawit gita
setata mamargi tan ugi piragi
angina ngesir ngasor ngusur
ring pasisi Sanur.

pondok tebawutu – 99

Nyoman Manda

PERAHU WANGKANG SRI KOMALA

anjut-anjut kasayut ombak pasisi
perahu wangkang Sri Komala malintang ngandang
nyandar ka pasisi kajambak ombak leak ngakak

bendega teka siaga matulung
krana ngalintang pasisi duen krama makarang
salah tampi, asih pitulung kaduga ekan tawan karang

Kwee Tek Tyang uyut kadi Cina kabegal
baan takut ngawe ekan daya uyut
perahu wangkang kagarang kadi tawan karang

masadu sendu ka tuan kompeni
sadu ngutgut kompeni anggut-anggut
eda takut
Walanda bakal mela
merang tawan Karang
Raja gumi Badung katantang
ekan-ekan Kwee Tek Tyang

pondok tebawutu – 99

Nyoman Manda

YUR BIUR PASISI SANUR, 1

ada kapal Sri Komala ngaba duka bala
Kwee Tek Tyang nandan Walanda mai
karena kapal katawan karang
munyin Cina kabegal mula dueg ngalih dalih
sing ada anak magarang
bendega enu ka pasih nayung dayung
nrajang gelombang ngalih isin basang

nanging pisuna katatah ulah titah
sang kompeni maan jalar majar-ajar
nandang nantang apang hilang tawan karang

tedung agung gumi Badung
egar mapajar, tawan karang suba hilang
gumi Bali terang galang
nyanggra sawitra joh ring dwipara

i walanda mula manusa dursila
panjang matulung kasungguh magarang
ungkit-ungkit tawan karang nguni

gumi Badung katantang apang nguliang
sahanan barang cina hilang
yen sing nguliang barang
gumi Badung bakal kaserang
ningeh munyin walanda buka keto
yur biur gumi Sanur
sing taen nyemak elah
enu masi lima bulbul ngayung dayung

pondok tebawutu – 99

Nyoman Manda

YUR BIUR GUMI SANUR, 2

peteng sipeng langit enggang lantang
bintang ngalayang mrinyang uyang
ana wangkang ring pasisi
nganjur iur biur di gumi sanur
ngorahang wangkang kajarah kagarang

bobab.....

sing ada wangsa sanur majarah
sing ada wangsa sanur nyemak elah
tuah warah manusa serakah
heee.....hiiiiii.....

sahana wong sanur hana tan hana
medal, medal sakeng puri, sakeng geria,
sakeng bet, sakeng ulun tukad, sakeng ulun kubu
sakeng batan nyuh, sakeng bet ngandang, sakeng tukad
pangkung
mangkat datang sekareng
harep tandang tantang jadma corah
matindih geni ngendih dumilah

mata sipit tan bina ubuan kucit
layah basangne ia cuit-cuit
jerit-jerit majarang wangkangne kaungkit

ene wong sanur
tan erang mundur
yur, yur gempur
bulusang kulkule
tepak kempur tepak beleganjur
wong sanur tan erang mundur.

pondok tebawutu – 99

I Wayan Mareg

CATUR MUKA

Dasar wong dura negari
Ugig ampehang angin ngalinus
Saking Dén Bukit
Ngalih elih gagelihan
Jukung bolong kampih
Ugig...kadalih
 Waduan Ida Cokorda kapisuna
 Apang sida kadalih maling
Dasar wong ugig...!
Ngalih elih gagelihan
Ngerik dakin basang
Nundun macam pules
 Gargita ngarenjit
 Ngunus keris pusaka
 Satya...
 Wirang...
 Erang...
 Campuh dados siki
Loloané ring Padang Galak
Blabur agung...
Magulungan...
Suryak danyuh
Puput ring catur muka

20/9/12

I Wayan Mareg

SUTINDIH

I/

Çiwa Ratri, Purwani ning Tilem
Sasih kapitu
Kapituwi Ida Cokor Dewa
Maraga wiku
Widagda
Waged ring ciri
Cirin jagat

Wédanan Ida kadi gulem
Cihna loloané
Ring Padang Galak
Gentuh..

II/

Duk punika
Nyerékcék rahnyané
Silapin cicing!
Sisané sidu
Wadahin bungkak nyuh gading

Pati luplup
Malaib labuh
Pati kaplug
Tindih ring idep
Ring gumi DENPASAR

Rahé dadi abungkak nyuh gading
Gumanti nadi
Semitan jagaté
Praline
Puput

20/9/12

IB Surya Matra

SEMENG RING PASISI SANUR

Galang kangin manundunin
Gumanti nundunin kayun
Nyliksik ati mangda metangi
Nyangra semeng ring pasisi sanur

I Bendéga ngencolang mulih
Wus ngruruh pangupa ri tengahing segara
Mulih makta pikolih
Tur kajantos I pianak somah

Toris-torisé sami suka
Gumanti nyaksiang suryané ngendih
Ring pasisi Sanur sané ramya
Luwih tan kakalih

Galang kangin manundunin
Gumanti nundunin kayun
Nyliksik ati mangda metangi
Nyangra semeng ring pasisi sanur

Maliang liang ring bias putih
Maplalianan toyan segara
Pasisi sanur wiakti luwih
Sampun Kaloktah ring dura negara

IB Surya Matra

DÉNPASAR MAI BARENG DINI NEGAK

Dénpasar jak makejang mai bareng dini negak
 Bareng macingklak ngadungang manah lan ati pakriak
 Saguluk sagilik salantur titi minehin kahanané jani
 Tolih ja ditu hotél né manyujuh langit
 Iwasin ja ditu torisé né melalung légod
 Mimih déwa ratu!!!

Dénpasar jak makejang, mai dini negak
 Bareng makejang ngadungang basang lantang
 Lan manah galang pang sami pada, pang sami trepta
 llangang sangsaya, tong ja itungang
 Nyapa tamyu, apa ké mendak I Ratu né malunan???

Dénpasar jak makejang, mai dini negak
 Bareng ngadungang rasa lan arsa
 Apang guminé setata trepta, inget tekéning swadharma
 Pinehin ja malu, guminé linggah suba liu tusing gelah
 Uyak vila lan umah méwah

Dénpasar jak makejang mai bareng dini negak
 Bareng maitungan ngadungang jalan né galang
 Truna bajang nak saja mabaju adat
 Nanging apa ké seken ulati tekén jagat???
 Para pejabat liu ngortaang indik budaya
 Apaké sujati sing madasar ulian daya???

Dénpasar jak makejang mai bareng dini negak
 Bareng macingklak ngadungang manah lan ati pakriak
 Bareng ngadungang rasa lan arsa
 Lan manah né galang pang sami pada, pang sami trepta
 Mangda Dénpasar nénten manadados pasardeen

IB Surya Matra

SEMENG RING KOTA DÉNPASAR

Magriung magrudug uyut
Sepéda lan motor pati brayut
Yéning suba jalan mamargi
Tegarang ja dedeh ring ati
Saling singguk sampun biasa
Saling malunin nak mula karasa
Murid murid melaib ngedirit
Dagang dagangé saling pejerit

Semeng ring kota dénpasar

I Wayan Paing

KESIRAN DIORAMA BAJRA SANDHI

Yén umpama,
tresnané dadi silih
asihé dadi dempil
barésé dadi patungin

Milu tiang abesik
milu nyilih
nempil matungin
apang pada tresna
pada asih
pada barés

Yén kedéké dadi simpen
sebeté dadi tanem
gedegé dadi urug
pisuhé dadi entungang

Ajahn tiang besik
nyimpen kedék
nanem sebet
ngurug gedeg
ngentungang pisuh

Apang sida landuh
sida demdem
keneh tiangé

Yén idupé dadi tawahin
tiang inguh
ané tawang tiang
idupé tawah-tawah.

Gulinten, 2010

I Wayan Paing

LOLOAN PUPUTAN BADUNG

Tan pamuncuk
tan pabongkol
sagét makeber
sagét nimbeng
tusing taén ngoyong
tusing taén leleh
makulekan
maiberan

Tuara taén maréren
maindengan
ané paek karasa joh
ané joh kapaekang
saling batek
kedeng
mapaidan

Ngaénang leleh
ngaénang galak
ngaénang jengah

Ngaénang inguh
ngaénang takut
ngaénang jerih

Ngaénang lega
ngawinang sebet
ngaénang kedék
ngawinang elek

Makulekan
maindengan
tuara taén nyambat pragat

Gulinten, 2010

I Wayan Paing

GAGÉNDONG PEKEN BADUNG

tiang boya jelema jaruh
ileh-ileh ngigelang nistan awak
tiang jelema idup
dot idup

Sarin sesambatan anak
sarin cacad awak
tuptupang tiang
anggon ngangselin basang tiangé layah

Gumin tiangé bias maebuk
unti gunung agungé
nyanyad gunung Baturé
ané mamedih
macak déwék tiang
masekaa sarin gumi

Ka kota tiang mlali
nuptupang sarin-sarin munyi tawah
pinaka brana bratan idup tiangé

Gulinten, Januari 2006

I Wayan Paing

TAMIU ULI TUKAD BADUNG

Ané malinder di natahé
ngorahang: Ngudiang ngepil
ané macelep ka kamaré kenjus
:aéng pedemané
ané macelep uli jendélané
matakon: nyén maid awaké mai?

Ané nyongkok di pamugpugé
gelur-gelur: liu iing liu baat
liu kambang liu kelem
sambila majalan numbrag
témbok durin umahé nyegagag
matolihan kuri mabesen
: da nyambatang Widiné bénjul

Tiang, ané ngelah umahé
malaib masesambatan
:blabar

Ida Bagus Gdé Parwita

DAS RAHINA RING PASISI SANUR

Langit lan segarané masikian ngawitin jagat
ngulati kahuripan pamurna jiwa
angin segarané dingin nangingin doosan ombaké
masikian sareng pamutus kayuné

toyan segarané degdeg masawang emas
ngulapin rawuh ring pangipian
warga lan para torisé
sané satata rawuh ngaruruh pitresna

oyagan daun taruné
ngetus alon paketél damuhé
rawuh ring pusering manah

pakliab langité sayan galang
nungkulang lawat jukungé ring pasisi
nyantos sang ngalintang masasanjan
nyurat pamargi lan pangapti
sadurung suryané matilar
ngedohang raga

Ida Bagus Gdé Parwita

SANUR, NGAWITIN GALANG

Ungguhan jagaté ring segara nyiriang
galang ngawinang ngelingang pikayun
pituduh nabdab pati uripé
nganutin tatimbang pamargi

segarané ngaléncok nutug pasisi
matitis lawat kayuné bengong mupulang angen
matujuhang suwung masawang sedih
nungkulang langité tan sida nulak ambubu
sané sayan ningkeb kaulangunané

jejeran batu kahang wates pasisiné
tan sida ngukuhang pretiwi
sané setata kalurug ombak segarané
sayan ebek melusin manah

wantah angin ngasirsir alon
nyambrama galang pasisiné
maka pisuguh uripé
sayan lepas saking raga

Ida Bagus Gdé Parwita

DÉNPASAR

(Pangéling-éling Pituduh lan Patitis)

Pakliab langité nambakin sunaran galang pasisiné
ngawedar sang rawuh masesanjan netesang pamargi
doh cacingaké nibénin langit
rasa tan sida ngawaliang
kawangian tukad Badungé rihin
utawi kalangenan ring pasisi Sanur
lan pasuryak segara Banua miwah Sakénan
sayan doh ninggalang suwung

Ring wates cacingak meruné kukuh
mapag sunaran langité
utawi nambakin pamanes para janané
ngaruruh pangupa jiwa

panulak kayuné masikian panes tis ideran suryané
wantah sang nyaga raga ngéntér pangaptiné
nambakin pamanes indriané
yadiastun matulak bedak tan kadagingan

keribisan toyané hening rawuh ring pangipian
ngetisin para manggala sané kukuh ngukuhang idep
kadi jelegan wangun Bajra Sandhi nambakin pangidih tresnané
tan obah yadiastun yuta biyota nyugjugin ngenyudin

Bangayang Taman Budayané ebek nyabran warsa
mapendak antuk tatwa carita lan tabuh pangeromba
antuk reriptyan krama lan manca Negara
anggé ngukuhang sunaran langit Baliné
nyarengin kawéntenan pura lan puriné

nulak sakancan wisa piobah kayuné

Ring tengahing sepi élingang kayuné
kadi kulkul pangiket pasikiané
nyihnayang pabesen anginé
setata obah nganutin sasih

Kateleban ombaké melusin pasisi
sida ngasorang pitresnan bintangé nyiriang wengi
nguduhang suwung ring pasar Badung
nyiramang kidung rikala wenginé nundun
nindihin pertiwi

Ida Bagus Gdé Parwita

PANULAMEN SEGARA BANUA

Tengah warsa ngentos sunaran toyané
nyihnyayang langité pelung tansida natak panyujuh kayuné
bengong kabilbil nututin panes marginé
nincap rawuh duhur segarané

Sunaran bulanné ngaliyep katawengin lingkehan marginé
sané satata ngajap – ajap pangerasan kayun
yadiastun ambubuné selem macampuh
ngundang rawuh ka manca Negara
toyan segarané hening kalikub gerudugan mesin
jukungé kabelet ring pasisi
kategul pangajap pangupa jiwa

Durung prasida pupus lawat bulanné katangkepin
nyantos suwung segarané matilar
ngawangun panepi rawuh kamuncuk kayuné
patungkas sang oneng midabdabin lelintih
sampun kelem ring dasar segara

Daun taruné kelés seka – siki kanyudang angin
nyiriang petengé rawuh ningkeb kayuné

Ida Bagus Gdé Parwita

CATUR MUKA RING TENGAH WENGI

Sunaran bulanné niwakin panyujuh jelegan tuguné
bengong nyaksinin pangungsin suwungé
nyaga pacampuh obah kayuné
kala petengé tan sida nguduhang bawos

Tangan tangan kukuh ngagem sarwa sanjata
pikukuh Baliné ngungsi tatujon
nundunin sang ngalintang mutusang pamargi
ngaruruh panglila budi

Catur Muka catus patta ngawitin pangungsi
nunggalang pangajap kayuné puput maputusan
nyujur pitresnané matelasan ngetohang jiwa

Ulanan carang kayuné natak keribisan sabehé
ngawangsitin bulané lek nyihnayang angga
kadi sang pralaya lascarya mabéla pati
ring jagat lian

Tugu Catur Muka tetep kukuh nambakin patungkas kayuné
nyiriang pituduh saéé patut katuju
sadurung ngalimbak ring segara kalangené doh
muputang patinget

Ida Bagus Rai Putra

JEMPIRING PUTIH

Nata Praja
Namostuti

Makuta Budaya
Mahkota Mandita
Ungguan Agama
Ungguaning Padma
Ulunangen Uluningati

Suksmaning Tanu Telenging Jaladi
Siksaning Sasmita Sang Sida Sidi
Pangempenging Sabda Bayu Idep Telenging Semadi
Litning Rasa Suda Nirtuduh Uriping Pati

Jempiring Putih Murni
Mahkota Makuta Mandita
Denpasar Kota Budaya
Denpasar Kota Sejati

Jempiring Putih Ambuné Wangi
Jejuluké Jempong Runtuhi Ring Ati
Pingéné Warniné Suci
Silak-Siluk Ngringring Piranti
Jempiring Putih Bunga Mahkota Denpasar

Sekar Mahkota
Sekar Sarining Bumi
Sekar Sarining Prana-Prani
Sekaring Budhi
Sekaring Widhi

Putih-Putih Susrusa Bakti
Putih-Putih Atiné Suci
Putih-Putih Sariné Murni
Putih-Putih Titahing Widhi

Ida Bagus Rai Putra

DÉNPASAR TUASING-TUAS

Pepinceraning Jagat Nusantara
Nusantara Pulo Pulaning Pala
Pala Tumuwuh Ayuning Urip
Uriping Sarwa Dumadi
Sané Mentik
Sané Lekad
Sané Mataluh

Tri Jnana Sandhi
Tuasing Tattwa
Tuasing Susila
Tuasing Acara
Panikelaning Wiku Linuih
Catur Prabaning Kawikon
Tuasing Banten
Tuasing Puja
Tuasing Tirtha
Tuasing Jnana

Papinceraning Gumi Bali
Bali Balut Bali Bala
Bala Balaning Bali
Bali Bantening Ugi
Bali Urati
Bali Glitik
Bali Iseng

Papinceraning Kota Dénpasar
Dénpasar Maha Wiryā
Wiryāning Praratu Purusa

Purosotama Muncuking Wira
Wi Bawaning Dénpasar
Wi Rasaning Dénpasar
Wi Adining Dénpasar

Dénpasar Kota Budaya
Budaya Linuihing Budi
Budi Tepet Rasa Gama
Gama Uriping Budaya
Buatang
Darsanain
Yasaang

Tatan Tutug
Tan Tantu
Tani Tetes
Ten Tués
Tuut Titi
Tusta Tuasing-Tuas
Tatastu Wastu Astu

Ida Bagus Rai Putra

DÉNPASAR MAHATIDANA

Mahawindu Kabudayan
Ritus Agung Panyejeg Jagat
Parumparam Sarwa Mandalika Rasta
Catus Pata Catur Muka
I Gusti Agung Madé Agung
Cokorda Mantuking Rana

Duh Mas Mirah Nini Atma Jiwaning Wang
Tuhu Sira Ya Suputri
Ping Sapta Anyadma
Sira Roanging Suka
Apareng Sadédé Singgih
Yéki Kawitan
Raden Déwi Nganjali
Si Ngurah Made Sibra Ananggapi Kawitan
Kinon Mejah Déwi Agelis
Sampun Pwa Pinejah
Kang Tangis Luir Ampuhan
Kang Puri Nuli Binasmi
Mijil Sang Nata
Para Istri Sama Ngiring
Tiga Ratus Prasama
Tan Aпти Mintar
Suka Ya Pejah Ajurit

Prabu Bagawanta Parajana
Makuta Mandita Uluning Budaya
Lascarya Nindihin Gumi
Mahatidana Maha Wirya
Raga Wadag Katur Ri Hyang

Hyang Hyanging Indra Bawana
Bakti Ring Widi
Bakti Ring Negri
Baktining Bandana Negara
Bakti Mulihing Suarga

Punapi Malih Baosang I Riki
Titiang Ngamangguhang Suka
Sakéng Malit
Ri Wau Polih Pakewuh
Dados Lalis Minggat Kedaton
Durjana Titiang Polih Genah
Napi Malih Ninggalin Pamrajan Ibu
Jakti Papa Kadi Ngaborsi
I Riki Titiang Manguhang Suka
I Riki Titiang Ngamasin Padem

Maring Kuta Dénpasar Linuih
Bela Belanin
Dénpasar
Mahatidana.

Ida Bagus Rai Putra

SANUR SYAAHRNUUR

Sanur Artos Caya Linuih
Sunaran Murub Mangangobin
Duk Patempung Susaktin
Maling Budiman Robinhood Bali
Ki Gledar Ki Sleseh
Mapadon Maring
Dalem Timbul Sukawati
Sang Manonton Gaok Kaédan-Édan
Angucap Syaaahrnuur
Ai Sanur Murup Ngabar-Abar
Ngardi Kasukertan Jana Maring Sanur
Ai Matanai Arka Baskarapati Raditya Surya Caya
Api Kemakmuran

Ai Sanur Kadi Nguni
Ngedas Lemah-Nyaluk Sandikala
Saking Semeng Ngrorokang Surya
Sunaran Ngencorot Nyuryanin Gumi
Sanur Sujati Agni Suci
Ngeseng Mala Papaning Gumi

Ruruhang Ilikitan Jagat
Sanur Gumi Pangawit Molihang Ai
Sunaran Hyang Widhi
Sanur Gumi Panguntat Kaonin Ai
Sunaran Hyang Jagat Karana
Karananing Dolaré Padulur
Pamargan Semut Sadulur
Bukti Mukti Sanur
Angabar-Abar
Syaaahrnuur
Mandadi
Sanur

Ida Bagus Rai Putra

SINDHU SANUR

Pamargin Pranda Linuih
Saking Tanah
Pidada
Punia
Sindhu
Singarsa
Sidemen
Amlapura

Nyukat Galang Nyikut Genah
Anglanglang Ulangun
Angdon Langa
Kawi Sunia Kawi Lelana
Ayogiswara
Nyepat Siku
Wiku Paraga

Sindhu Maring Sanur
Surya Jati
Pangéling Wisma
Basmangkura
Pangiring Gajahpara
Pangéling Pura Patal
Patalinagantun
Tantri Kidung Manduka Arana

Nyupat Dongkang
Nyupat Kauripan
Nyujur Surya Nirbana

Tantra
Samadi Bawana
Praba Swara Jnana

Manah Langit
Nyurya Sewana
Santa Smreti
Ngutpati Karana
Murwa Sadana
Amerta

IDG Windhu Sancaya

IDA BAGUS MANTRA

Pakibeh jagaté tan keni winilang
titiang manggihin ring tengahing segara
kadi samar Sang Hyang Baskara nyusup ring gigiring
samudra wisésa

Ring langité kangin wénten panggihin titiang gegambaran
para truna-truniné mapééd mapanganggé bungah
making mawirama smarandana miwah
merdukomala
samar sawit piragin tityang wénten suaran samara
pagulingan

Katingkahin antuk suaran selonding
ngiringang daha trunané saking unkur
masolah laksana ayu
ngulangunin pisan

Rasa sujati nganyunin pemargin jagat duwéné
ring tengahing samudra maombak galak
dados kadi galang pisan antuk macecingak

Ring sripit marginé tengahing wana
wengi ring tileming sasih kapitu
dados panggihin margi sané tinglis
sané patut tuut lan duluh nuju galangé sujati

Kadi Sang Hyang Wiswakarma
ngaryanin gegambaran sané ngulangunin
indik kautaman suargalokané
nanging makéh tan pawikan ngilingin gegambarané

(Saking pupulan sastra Bali anyar *Coffee Shop*, 2003)

IDG Windhu Sancaya

PROF. BAGUS

Wénten sané maosang
Yukti manawi sangkaning embasé
dumunan
mawinan prasida akéh maparilaksana
Nanging akéh sané dumunan embas
kéwanten tan wénten cihna katinggalin

Pemarginé gancang kadi suluk toyané ring masan sabeh
sapasira purun mialangin janten keni kalabuk
pakayuné sebet tan wénten né sida nangkis
akéh sané kawilangin riantukan tan wénten né ngayunin
akéh né nyumbungang naler akéh né moyanin

Pamarginé gancang kadi angin baret sasih kaulu
pakayuné gelisan rauh ring sané lianan
tegeh ngalik becat kadi lelipi awan
gelisan kasép antuk minehin

Sesampuné galahé rauh
panumayané tan sida antuk mialangin
duaning karsan Sang Hyang Tuduh
sami rauh sumungkem ngélingang raga soang-soang
ngélingang pemargin duwéné sané sampun-sampun
kadi nénten wénten nyamen pada

Yukti boya sangkaning embasé dumunan
yukti wantah metu saking telenging hredaya
yukti!

(Saking pupulan sastra Bali anyar *Coffee Shop*, 2003)

IDG Windhu Sancaya

DÉNPASAR KOTA BUDAYA

Dénpasar kota budaya

Ngedas lemah ngantos ngedas wengi pasliwer anaké ring marginé tan surud-surud:

Ring jalan Gajahmada wénten pasar Badung,
ané setata kebekin olih dagang-dagang saking dura désa ngrereh pangupa jiwa

saking semeng ngantos ka semeng

saking peteng ngantos ka peteng

anaké rauh matumbasan taler tan surud-surud

tukang suwuné éncol nyagjagin “bos-bos” sané tuwun saking mobilé

Bes raménné, ngantos kakaryanin parkir betén tanahé

sakadi omang-omang karag-kirig ngrereh genahnyané sowang-sawang

Dénpasar kota budaya

Semeng-ngremeng ramé anaké mlaib ring margi-marginé maolah raga. Wénten sané senam tai chi, wentén taler falun dafa miwah sané siosan, di sisin-sisin lapangan Puputan Badung I Gusti Ngurah Madé Agung

Mategepan pisan: Wénten cina tua-tua, wénten arab anggut-anggut,

wénten jawi, wénten madura lan sané lianan, bajang cerik lanang istri gancang majalan saling langkungin

wénten taler tentra nglintér mlaib nglindérin lapangan puputan: tuk wak tuk wak tuk wak!

I kaki lan I dadong masih milu majalan adéng-adéng sambilanga kitak-kituk ngenehang Dénpasaré ané malu lan ané jani.

Tengainé,
pagérung montor lan mobilé saling langkungin
marginé démpet ngémpéd kadi punyan boni nedeng mabuah
toko-toko lan swalayan tan pendah saling ngedéngang harga
murah
lan diskon sing dadi tawah
pasliur raré lan truna-truniné “méjéng” ring mol-mol
mitbit ayam goréng kentaki, burger makdi, lan pizza hat
sambilanga haha hihi héhé hoho...

ring betén punyan celaginé miwah duwur trotoaré akéh anaké
main catur ngolah otak sambilanga ngroko klepas-klepus
makedékan
ané siosan mabalih sambilanga milu makeneh, ngenehang
dévékné padidi
ring vila-vila sisin tukad ayungé para ékspatriaté maca buku,
nginum kopi lan makpak roti sambil mligbagang budaya baliné
aduuuh...aduuuh...!

Sorené,

Pasliah warga kota Dénpasar medal ngrereh angin, mlinggih ring
tengah lapangané sambilanga melut kacang lan ngutgut jagung
bakar.

Wénten sané ngajak pianak lan somah, wénten ngajak cucu lan
dadongnyané.

“Es krim kak, és krim kak,” cucunné matagihan. Dagang lumpia
éncol manyagjagin.

Wénten taler alit-alit sané mlayangan, nendang bola sareng timpal-
timpalné,

sané siosan ngebérag kembungan lan ngupin emprét-emprétan.

Di sisi kangin, kelod, kauh lan kalér lapangané tukang parkir lan
dagangé saling seluk.

Dagang bakso tréng téng tréng téng, tukang parkir keprit-keprit
sambil nudukin pipis.

Kacang rébusé nglepus mesuang andus katumpukin jagung rebus.
Dagangnyané kuangan galah ngayahin sang numbas

Banjar-banjaré suwung mangmung suwud kapayasin
Klian lan prajuruné uyut nepukin cerik-ceriké maplalyanan ngawé
luwu

“Banjar kedas dadi ményi, mulih mulih!!”

Cerik-ceriké mlaib ngalih tongos gim-onlain, plé-stésion lan
internét

Ha ha ha...

Dénpasar Kota Budaya

Patung catur mukané kangen manggihin warga kotané sekadi
nénten kenyel-kenyel

Majeljel

Saja mrasa kuangan awak lan kuangan tongos

Nanging sampunang ngantos kuangan pamineh

I bapa negak di balé dangin sambilanga ningehang radio
wiréh sing bani pesu ka jalanné

di radioné ada anak cenik matembang sinom

tembangé ngasirsir nempuh kupingné ané suba bongol:

“...idep beliné mangkin, makinkin mayasa lacur,
tong ngelah karang sawah, karang awaké tandurin,
guna dusun, né kanggo ring désa-désa”.

Dénpasar, Anggara Wagé Matal, 6 Novembér 2012

I Madé Sanggra

DÉNPASAR SANÉ MANGKIN

dénpasar sané mangkin
katah pwangun nyujuh langit
makwéh sawah dados umah
umah dados sawah

dénpasar sané mangkin
pasliwer wong sunantara
solahnyané soléh-soléh
payasnyané melag éndah
malalung makamben lambih
macukur mabok dawa
luh matingkah mwani

mwani maambek....

Agustus 1971

I Madé Sanggra

DÉNPASAR SEDIH

(déning wraspati klau, 21101999)

barak-barak paningalannyané
kadi barak tangkahnyané
éngap-éngap kipekannyané
kadi ngaap tangkahnyané

kandik memandik tan paindik
sundih ngendih nuut pedih
kadi pasih
ileh-ileh ngaba ilih ngalih lih

amegat sih
dénpasar sedih

sira pelih (?)

Sukawati, 22101999.

I Madé Sanggra

PASISI SANUR

putih-putih ombaké madidih
ngengah ring tengah sada élah
putih-putih biasé ring pasisi
genah suci mlasti
dumun bet tenget mider ring pasisi
ngresin manah rahina wengi
katah juru pencar juru tokal
kajantos biang niang dagang ulak
lan raré angon jurkud-jurkud
ngedeng tali nénten lali
sai tan malali
ulamé nengok dados jokot
raré angon lega dagang ulaké bagia
bendégané lega bagia !

putih-putih ombaké madidih
kuusané asawang sedih
putih-putih biasé ring pasisi
genah ngulati basang misi
mangkin umah tegeh kadi pagan maileh
jukung tan keni antuk ngitung
sami tan ngrereh ulam
ulamé magenah ring manah
manahé tan ngenjek tanah
pasisiné mapanggal-panggal
matugel-tugel
matebih-tebih
ombaké makuus asawang sedih
putih biasé tan kari putih
malih pidan mulih malih (?)

Sanur, 04071998

Djelantik Santha

TAÉN SIAT

Nguni, guminé degdeg
Layah I Welanda ngélél, di Sanur
nyorog perahu ngaba ringgit
kadi nimpug ngelidang lima
mancing di yéhé puek
mapi-mapi sadu
mangda sang prabu kalebu.

Bala Bali mabulet kancut ginting
lascarya ngecorang getih
puputan béla negara
magut mimis, léla lan jemparing
layon makipu rah sepanjang margi Kesiman,
karang puri Denpasar, lan Pamecutan
di Taénsiat siaté yukti ngresresin ati
sang sura brasta ring rana amerih swarga.

Bancingahé kancab rah
tunon kadi pasepan masaang tulang belulang
karas negarané kasurat mangsi abang
pangrupak pedang lan keris, sang putri lan
para istri ngubar tunun ngunus blida lan cundri
sami mabéla pati, tan wedi kajamah musuh wéci
waduwané pejah ajur nglemekin jagat.

Sampunang lali, kéh musuh doracara
tegal, carik, pasisiné tawahin invéstor, kadi kelimpit
nyegut ngasih-asih, puriné paranin toris mapi ngetis
uripé urupang dollar, ngulah basang bengkis pules tis
mitrané jalir sumilir nyajah uli silib.

Dénpasar, 2 Nopémber 2012

Djelantik Santha

DAM OONGAN

Tukad Ayung toyané dalem
tangkid pangkung sami kelem
nglatak kadi cadik Délém
pilah paluh ngetuh

Tonja kari mandus peluh
wang tani Renon ngayuh
pabianan kirang gemuh
Tanjung Bungkak terak
yéh tukadé ngetél bedak
subaké engkak-engkak.

Ka Kesiman sami natak
pinaka klian ulun Subak
dam Ooongan kasiwi
pinaka Ulun Suwi
toyané landeh mili
ngecokin sawah Kebonkuri
Tanjung Bungkak ngakak
Subak Renon masuryak
Sanur jingkrak-jingkrak
Toyan telabah setata maliah
dam Oongan ngawé bungah

Nanging akéh sané tan uning
wénten carita ngawé jering
bolun kalong merinding
sapasang pangantén nyumpling
tan kalugra rerama masanding
satia dados dasar
dam Oongan toyané ening

Djelantik Santha

JUKUNG MABISAK UWÉK

Jukung muhmuh maecét pelung
aran katulis Putri Duyung
bidak uwék dayung elung
macangcang dipasisi pelung idung
tan bina kadi cicing berung
maguyang dibias putih Sanur Agung
muat bocah bulé istri kakung
kulit soklat rambut jagung.

KadéK Ari maranin sang bocah
rasa kadaut manah osah
kenyem raré ngawé bungah
marawat matra saking keliah
gélanné lawas né sampun pasah
kadi numadi dados sang bocah

“Baby where are you coming from?”

:Tiang uli Belanda tanté.”

“Oh, cening bisa mabasa Bali?”

“Bisa tanté, tiang mula nak Bali,

niki papi Nita lan Yoga teka ngaba roti.”

KadéK Ari bengong siep alah dampeh

Sadhu laad gélanné kenyem pakeh

sang kalih éling ring pakibeh

sawindu di Sanur tresnané puceh

matemu malih manut paileh

jatu karmané tan keni baan nakeh

jukung Putri Duyung maecat pelung

di Sanur kadi nyambung ladung

malayar nrebak pasih pelung

bidak uwék dayung elung.

Djelantik Santha

LÉAK SANUR

Waluya kadi bukit ejohin
sami kanten lungid rawit
ring Bali ngadén léak Sasak sakti
ring Jawa ngadén léak Bali luwih
ring Sasak kasub ngundang begiq
ring Jawa pascat ngadu santét
ring Bali léak pangiwa ngendih
sujatinné sami wantah bukit ejohin.

Duk jaman perang nguni
Belanda tedun ring Sanur
Jepang madaret ring Benua
serdaduné sami ngandet buang
ngalih lonté sakama-kama asal lua
bilang bajang kaplegandang
ngawé resres bajang Denpasar
kaparikosa keni peluru nyasar.

Léak Sanur nesti dados caru
nyuti rupa dados istri jalir
jegég ngolér matandang begér
dagang nasi mimbuh laklak
dipasisi dibongkol pandané tan tulak
asal iserdadu wadiah pasti kalilih
bajangé selamat iserdadu lemet
léak déstiné siteng maguet

Bajang lan istriné sami nganjali
matur suksma Ratu Lingsir Istri
saktiné kadi Cadu Sakti

Madé Sugianto

SANUR KESIAR KESIUR

Suryané endag di pasisi Sanur
Miikné Ni Polok makebiur
Lé Mayéur degeng nglantur
Sanur kantun jujur

Suryané nyentak di pasisi Sanur
Girang torisé ngebatang kasur
Mamaca cakepan nglonggong anggur
Sanur mula miik makebiur

Sanja suryané surup di Sanur
Kakupuné matanja anggur
Daah duuh Sanur kesiur kesiur
Tiang jekeh Sanur makebiur
Apabuin majedur

Madé Sugianto

RENON

Rénon pidan dadi tongos penganggon maémbon
Tongosé mula saja romon
Rénon jani liglir tan pakayon
Majujuk nyujuh langit wangunan beton
Ditu jani tongos nang kuasa maémbon

Madé Sugianto

LAWAR DÉNPASAR

Dénpasar cara jukut lawar
Mapunduh paturu ngaba rasa
Masem, manis, lalah, pakeh
Mamesik ngwarnin kahuripan

Dénpasar cara jukut lawar
Ngalih rasa lawar ka Dénpasar sing dadi kasar
Melahang ngigelang
Pelih salah, Dénpasar bisa majedar

Madé Sugianto

MALAJAH DI TONJA

Di Tonja padagangé tusing matanja
Jeding jedingé majéjér di duur méja
Ditu tiang malajah masukserah
Yén ada nasib, jedingé pasti kabayah

Di Tonja undaginé masatya
Makarya gerabah sangkaning tresna
Ditu tiang malajah
Apang idupé melah

Madé Sugianto

LUMINTANG MASUNAR GALANG

Liaté taén entuk matolihan kauh
Jineng beton matumpang langité kajujuh
Di sisi sing ada tongos maémbon ngalih dayuh
Di tengah nang kuasa nudingang tujuh

1999 pinaka saksi
Sakit ati ngempahang brangti
Api ngabar-abar di kantor bupati
Umah beton puun sami

Lumintang dadiné galang
Wangunan anyar kajujukang
Dini ditu tumbuh taru perindang
Lumintang masunar galang

Taman Kota Dénpasar macahya bintang
Tua bajang ngruruh liang
Ngalih peluh nglinderin tanah lapang
Ngulati dayuh mangda manahé nyegerang

Madé Sugianto

SESAWANGAN SEMAWANG

Béné dini di Semawang
Kapencar
Makejang kapejang
Di telagané anyar
Yéhné tis
Kija-kija paketistis

Béné sing buin berag
Sisikné sing buin engkag
Béné nglangi binar
Sisikné masunar

Anaké ané mancing kuciwa
Yadiastun banehé jaen kabinawa
Saru saruanga tekén béné
Ané sayan boleh awakné

I Pedanda Baka
Gedeg ia
Makelo mam mantra di sisin telagané
Sing runguanga tekén béné
I Pedanda Baka makeber ka ambara
Kenehné panes bara

Raka Sukmadi

SURYA TÉJA KEMBAR

Ida cokorda madé dénpasar
Ida padanda madé Sidemen
Prabu lan wiku atatekén sastra
Ngulik aksara ngulati lengkara
Paras paros sarpanaya
Tios linggih beda lungguh
Nanging tunggal hrédaya
Nemuang suéca lan bakti
Ngardi rahayu badung ugi
Sang wiku nata raja rsi
Sarahina nyurya sewana
Ngaptiang jagaté galang
Ngeripta lelepihan
Nganutin rasa sasmita
Saking telenging ati
Wantah kasusilaning budi
Sida ngentasin segara sanghara
Tur selampah laku
Guna dusun
Nandurin karang awak
Sang kalih saksat téja kembar
Nyunarin badung ugi pulina bali
Tios wangsa beda pamargi
Macepuk ngerahayang gumi
Nitya puja ring hyang aji
Tan sida pasah ring sajeroning caritta
Pinaka suluh patut tulad
Waluya sekar wangi
Tan kalayuan, salantang pamargi
Salampah urip

Wrespati umanis matal 2012

Raka Sukmadi

DÉNPASAR HERITAGE

Balé kukul Tambang Badung
Saksi kalaning nguni
Pasemetonan Kibarak Panji
Sareng Anglurah Pemecutan
Satsat dasar pengawit
Kedatuan Badung
Pemecutan, Dénpasar lan Kesiman
Sida masikian
Sagilik saguluk magilir
Dados pamucuk
Ngetangan gumi
Ngawangun puri
Nangiang pura
Kawarisang nanak putu
Sané mangking sida pangguh
Tatamian leluhur adiluhung
Sisan puputan badung
Kaselametang dados muséum
Wantah tatujon torisé rawuh
Dénpasar kasub kasumbang
Sukerta dayuh landuh

Raka Sukmadi

PUPUTAN

Soma pon matal 2012

Tongkang Sri Komala uwug
Kakedeng ka pesisir sanur
Punika wantah bantang
Ngelemigang bungut I Welanda
Nekepin uled basang
Makita nguasa badung
Nanging Cokorda Dénpasar
Sang ateken aji
Wruh ring sasmita
Pascap matetenger
Nyobiahang purwa sanghara
Ida lescara nekéng tuwas
Sudira sadia magutin welanda
Pinaka musuh gumi
Lasan mati timbang idup
Nyakupang lima mayah upeti
Sameton wargi saur manuk
Sumuyug sareng mebelapati
Nindihin gumi tanah palekadan
Sagilik saguluk
Salunglung sabayantaka
Reh rurung idup
Lan margi idep sampun matemu
Nunggal ring kayun
Tosing satria mahotama
Tan ulap déning pipis
Tan kobér, sura dira
Swarga ring tungtunging bedil
Lampus lanus
Puputan!

Raka Sukmadi

IJO GADING CARIK RENON

“Ring cariké sane liggah
Pantunnyané sampun kuning
Icétrung ngelah pianak . . .”
Sinom cétrung punika
Temon-temon warsa lawas
Anggén pangéling-éling
Carik renon badung ugi
Kasub pantun ijo gading
Jelih lambih kasumbung
Ke dura negari
Angin ngesisir aris
Ngetut ipian wong tani
Arip sejeroning kubu alit
Kemaon mangkin
Sami brasta magentos
Tetangunan beton ageng ngalik
Genah penggede ngetangin gumi
Lipia kawit lali indik
Maosang mélanin wong cilik
Rikalaning kampanye
Nanging sesubané suba
Prajani buta pramangkin bongol
Busan-busan ngaku repot
Nenten wenten galah
Miragi pakrimik rakyat
Pajeg tanah sayan nincap
Margi sayan cupit
Kosek nyepit sané alit
“Ratu Agung
Kenken abeté madaye”

Agoes Sutrama

ANGEN DÉNPASAR

ring jempiring,
né sareng nyurat kenangan

cahyan i bulan remrem kalem
nuluhang pamargi para umat
nemu hyang saraswati, iriki...
megurat lawat gedong muséum
ri delodné, natah rah ri arep né...

sang ibu mobot katimpalin rabin nyané
muah pianakné alit, mamargi ngiterin
lapanganné kocap dumun genah
rah meliah, pejah pinaka kusuma wangsa

ketug tangkah mabarung pongah
gambelan margapati lan baris tunggal
napiké ati né nunggal
ring tengahing muséum, para sisya jemet mlajah
iriki menyantosang, ibah

kekunang gajah mada mengatehang punyah
tanpa daya tan pamitra
sarwa pustaka né sida ngalila cita
toko buku ri tebén gedong ageng
sareng metis nunas margi
a jam ngawai, sawai stata sayaga nglipur lara

sabehé ngansan bungah, tél
toyo sané nrébés saking tembok masurat kasih
melusin pipiné manis

usap tiang antuk semaya seidup semati
sekadi daging film né wau keputer iriki
gedong bioskop dauh margi diponegoro

jempiring,
sampunang ical

marga margi pacang kentsin kasih
genah genah kasimpangin malih

ring saraswati titiang nunas
dénpasar langgeng lan dirgayusa

Putu Réland Dafincy Tangkas

DÉNPASAR MASUNAR

Nyandikala

Suryané mawali ring pascima

Ambuné

Sada rem-rem nyapuhin guminé

Cingakin té

Metu galang bulané nyunarin

Yadiastun sunar suryané nilarin

Cingakin té

Damar-damar alit-alit ring margi-margi

Umah-umah sada makenyit-nyit sundih-sundih

Cingakin té

Damar montoré kangin kauh maririgan

Kadi kunang-kunang majalan ngungsi genah

Warna-warni

Kadi manik-manik buyar sambek tan kirangan

Ngiasin margi, ngiasin peteng gumine tan kapangan

Dénpasar galang, Dénpasar masunar-sunar makalangan

Meled manahé

Ngiterin ring ambarané

Ngatonang swarga ring wenginé

Wengi Dénpasar, nudut manahé

Buddha Paing Uyé

141112

Madé Réland Udayana Tangkas

JEMPIRING PUTIH

Miik ngalub

Mangubek sakala

Sakala niskala manyusub ring harsa adnyana

Sinah mangawi bungah ya tan péndah

Putih makadi asri

Saksat metu hyang mahéswari

Maha suci ngebekin ati

Asri mangiasin salantang margi

Duh, mas putihku

Rasa kalulut tuas atinku

Metu kayun jagi mangadekin

Meled manah pacang manyumpangin

Duh, bungan surga

Metu saking indraloka, pinaka pahyasan para déwata

Pinaka pralambang kota mautama

Manyupat ring pangider bhuana

Ring sor suryané masunaran metuang bayang-bayang

Malawat mulat masolah kaampeh-ampehang

Rasa angob tur liangé sakayang-kayang

Ngaé buduh tan kapayang

Bungan jagat, jempiring putih

buddha-kliwon-matal

071112

Madé Réland Udayana Tangkas

DIJA KÉ DOKARÉ JANI?

Salantang margi

Apit seman badungé sepi

Tis. . .

Betén punyan kepuhé mangetis

Suwung tan ulian katundung

Dija ké dokaré jani?

Sira ké lakar takonin?

Sira sané uning?

Apa ké punyan kepuhé?

Apa ké jalan aspalé?

Apa ké angin ngesirsir, sumilir, tan sadia nyautin?

Dija ké dokaré jani?

Suwung mangmung manarawang puyung

Puyung plungpung sada ngapung

Apa ké Denpasar kilangan dokar?

Apa ké dokaré suba matilar?

Apa ké jaran-jarané sampun buyar?

Apa ké supir dokaré sampun bubar?

Ilang kadi kaanyudang blabar

Uli monang-maning neked gajah mada nglantur ka puputan

Odah-odah masuwunan keranjang mangantiang di sisin jalan

mapangenan

Guminé jani, liunan montor griang-grieng ngebekin jalan

Munyin batis jarané nganteg aspal tusing madingehan

Jalané ramé tuah tusing ada selah

Anggon dokaré ketiplag-ketiplug tur mageriah-geriah

Apa ké jamané enu nganggoang dokar?

Tusing ada genah anggon dokaré matingkah bingar

Tusing ada galah anggon dokaré ngédéngang sangar

Dija ké dokaré jani?

Dija? dija? dija?

saniscara manis medangkungan

031112

Madé Taro

KEMBUNGAN ANGIN

Alit-alit pasisi kangin
nabung kembangan angin
matambung sapisan
liang sapisan
liang suryaké liang

Kembangan angin
nglayang iing
nglayut ngaduluang
makebur makenyung
nyaruang takut ulung
linagé suryaké ilang

Kembangan angin
nglayang ampehang angin
nglayut ke langit pelung
nglayut anginé ngepah uli bungut
nglembat anginé bedah uli basang
nglayut l basang puyung
nglembat ngatebéngang
ulung
horééé.....!
Liang suryaké liang
liang puyungé liang

Dénpasar, 2002

Madé Taro

DON CAMPLUNG

Don camplung
cingak sira ring sor
sirsir angin
ngelut tangkah, ngilgil
tigang warsa mapasah
pangkah I sampan
mlayar ka tengah

Don camplung
cingak sira sané nyurat wénten pawarah anak mlayar
nyampuh segara jengah ngurasah
deres arus nganyudang sampan
ngelut angin ngulah ka tengah
nyulub ombak mungkah ambah
nincap jagat ngulat manah

Malih pidan I sampan mawali
I don camplung nartayang
sampun macemplung
ring segara pelung
banggayang sirep
reprep
madakep

Don camplung
makudang bidang sampun kasandang
makudang carang sampun kacadang
mlayar I sampan
mlayar ngatengahang
napi malih jagi katincap

Dénpasar, 2002

Madé Taro

KACUNDUK PAN JANTUK

Nuju kacunduk
magatra Pan Jantuk
suluk subuk bibihné
sebet kobet tangkahné

Inget layangan makorot?
ditu di muncuk kelampok
nyanggol nyangkét nylimur bengong
ngamaniang tuan insinyur mentang benang
ngukur ngatrol I klampok
kayang bongkol kagayot
kagentos beton abot

Tegal jagung genah matembing gayung
masahsah palabungkah puyung
payar-payar kasampet kélangan got
jelinjing pabelat kacakup sértifikat
apang élahan tuané main golf
Apan gunan subaké marebat
kadén suba kasambat mapikolih
ngilih-ngilihin tamu apang demen mabalih

Dipesisi kelod
nampi pasih aad
cerik-ceriké marerod
makekarang bungan kapad
nyuluh ulad-ulad apesanan
munuh gremong agoréngan
kanggoang awaregan

Da Cening ngapak-apak
ngejuk omang-omang di padang galak

sing buungan satpamé nganggarang pentung
ento kocap pasisi gelah anak
genah turisé ngajap-ajak nglincak

Buin apaletan
sabilang Galungan
tukang ébat ngelidin talenan
koné aluhan ngarap bizza lan salad
Buina nguda tuyuh-tujuh ngedeng peciwat
kaden di toko Eng Kwat
bir bintang makerat-kerat

Sebet Pan Jantuk
kobet maunduk
makécéh yeh mata
ngangen duk subana
"lacuran Cening numadi
sayan nyelékang guminé jani"

Nuju kacunduk
kubun Pan Jantuk
ngob tiang ngiwasin
homestay di balé dangin
bungalow di balé dauh
garase di balé daja
di paon mapangkon-pangkon
magic jar magic com
blénder rice cooker
kulkas air condition

jekeh bani tiang matakon
"Pa, dija Bapa I mali
nyangkétang piting kau?"

Dénpasar, 2002

Tudékamatra

KUNANG-KUNANG DI LUMINTANG

Sandikala, sunar surya ilang
Angin nyambahang dingin
Peteng nabdabang
Nglintangin Taman Kota Lumintang,
ada kunang-kunang teka
Ngendih di bibih peteng
Ngalihin apa?
Tuara pedas tawang
Kunang- kunang makeber
Uli muncuk punyan celagi
tuun ngusudin padang gadang
Girang?
Tuara seken tawang

Nolihin endih kunang-kunangé ento,
abesik ané pedas bakat ingetang
Ada endih dasa tiban ané liwat
Ditu, di Lumintang endih api pedih,
muunang wangunan kantor pemerintahé
Puun....!
Ento dasa tiban ané suba liwat
Miribké i kunang-kunang
nu ngalihin endih api di Lumintang?
Tusing karambang baan tiang

Kunang-kunang makeber di Lumintang
Kramané maliang-liang
ngliwatin sanja nyujuh peteng
Ngantosang panekan kiap paningalan
Katimpalin jagung bakar lalah manis

Sebilang peteng setata ramé
Suryak
Kedék
Masuryak makedék ngakak
Nelahang sekabulih jagung bakar
kanti kenjel bibihné makinyukan

Ngendih bara api di pemanggangan dagang jagungé
Ngangsan engsap kramané tekéning endih api
ané taén muunang wangunan kantor pemerintahé ditu
Pun...!
Dadi taman tongos kramané nyalanang girang
Dadi lapangan tongos kunang-kunang
ngendihin peteng asliaban

2013

Tudékamatra

PURNAMA BA DUUR SANUR

Putih bias pasih

Sekabedik saru tepukin kedas putihné

Peteng ngingetang pajalan galah

Ngingetang polos sisin pasihé ipidan

Satondén ada wangunan matumpang-tumpang ditu majujuk

Bendéga-bendéga majukungan ka tengah pasih

Ngejuk bé anggona pajakan dinané buin mani

Dugasé ento, tuah bendégané

ané majlawatan ditu di nuju peteng dinané

Purnama, galang di pasihé

Nepet tilem, sing ada bakat gabagin di peteng sisin Sanuré

Apa buin gulem tan pabulan lan bintang-bintang,

peteng dedet tuara ada nungkasin

Ané jani, putih bias pasih Sanuré,

diastun peteng tengah lemengé nu pedas tepuk kedasné

Sing ada tilem nu rasayang ada ditu

Gulem tan pabulan bintang tuara mapuara apa-apa

Sing lemah sing peteng setata ramé tepukin

Dagang jagung, dagang lumpia makacakan sisin pasih Sanuré

Ada sunar ané ngaénang galang sebilang wai,

nglintangin tengah lemeng galahé

Wangunan ané matumpang-tumpang tegeh ento,

ngendihin lampu tuara taén abedik

Galangné neked masi tepukin nganteg uli Sukawati,

Blahbatuh, lan Gianyar

Sajan, diastun tan papurnama,

Sanur ané jani tetep galang di tengah lemeng

2013

Tudékamatra

CATUS PATA CATUR MUKA

Tengah wai, liwat tiang di pempatan ento
 Tajeg surya, liu ada anak majujuk
 di tengah-tengah pempatané ngiterin Patung Catur Muka
 Mahasisya-mahasisya uli makudang-kudang kampus
 pepes mapupul ditu
 Maorasi, aksi simpatik, ngritik pemerintah
 Ngritik hukum negarané
 Ngritik bupati, gubernur, nganteg présidén
 Ngritik makejang ané tusing patut

Boya ja pelih buka kéto
 Patut sajan ento makejang!
 Nanging, abesik ané pinih patut buin incepang
 Buka tatwan Catur Muka bisa ada ditu di pempatané ento
 Ingetang, ipidan ditu sing ada Patung Catur Muka majujuk
 Dugasé jaman Wolanda, ané ada ditu tuah matan jam
 ané gedéné ngebekin balé dangin
 Apa mirib tetujoné para lingsiré nuunang jamé ento
 laut nyujukang Patung Catur Muka ditu?

Catur Muka di catus pata Kota Dénpasar
 Pinaka pinget para pratisentana kota budayané ené
 Sanghyang Guru, Catur Gophala matangan patpat
 Genitri, maarti puser makejang ada sig kasucian lan kawisésané
 Cemeti, maarti kategasan patut dadiang lelampahan sebilang dina
 Cakra, ngaran sebatek ané nglanggar hukum apang kahukum
 sepatutné
 Sungu, ngaran pemerintahé apang masatya tekéning undang-
 undang

Catur Muka, maprerai patpat
Kangin, Sanghyang Iswara pinaka kawicaksanan
Kelod, Sanghyang Brahma pinaka tata tentrem
Kauh, Sanghyang Mahadéwa pinaka tresna asih
Kaja, Sanghyang Wisnu pinaka panyupatan nyujuh kasentosan
Ento ané madan pemerintah, Guru Wisésa
Ingetang pesan!

2013

Tudékamatra

PURA JAGATNATHA-MUSÉUM BALI

(Dadua ané madampingan, nanging...)

/1/

Maseksek

Masuksuk

Macaket di candi bentaré

Pamedek tangkil ngebekin natar pura

Padmasana majujuk tegeh satmaka ngelingin krama

ada Betara di gumi ané nyaga lan ngaksinin solah i manusa

Telaga ngiterin Padmasana

Tunjung mentik di tengah ning telaga

Bé-bé nglangi di betén tunjungé

Andus dupa, miik bunga, tusing taen pegat ditu

Leluun canang ngebekin natar pura sebilang dina

Maseksek

Masuksuk

Makosod porod di pamedalé

Purnama-Tilem,

Galungan Kuningan,

Saraswati, Siwaratri

Tusing taén sepi kramané ngaturang bakti

Luh muani, tua bajang, mabusana putih kuning

Ngebekin natar pura

Malajah nawang Betara

Nunas ica, nyaduang pikobet idup di kota

Nunas pangaksama, nyatuang pelih ané aluh baan ngalih

/2/

Sepi jampi

Suung mamung

Sing ada ané majlawatan teka macelep
Pura-puri wewangunane majukjuk sepi
di tengah ramén kotané
Tusing liu patirungu
Saru-saru ada di masan liburan sekolah,
tua murid-muridé dogén
Buina langkah-langah pesan
Nguda tusing ada teka mai?
Né muséum patut pelalinin!
Boya gua di tengah alas madurgama

Sepi jampi
Suung mamung
Buku tamuné kedas
Ukiran parasé maong mekodong
Di natahné masi tusing tepukin ada leluu makacakan
Mai ja mai, delokin muséumé!
Ajaka dini malajahin babad para Leluhur Baliné nguni
Buléléng, Jembrana, Karangasem, Klungkung, Tabanan,
Bangli, Badung, Gianyar, Dénpasar, iraga besik dini
Madan makawitan tanah Bali

2013

Putu Éka Guna Yasa

SUBAK

Toyané ening, padiné kuning, sunariné magending,
gumatat gumitité macaling paling
petaniné éling.

Liang maguyang yadyastun sami kirang
Demen makenyem yan tatandurané olem-olem kalem
Liang megadang napkala masan endang
kukuh teguh pangadegé gedé gangsu
masanding ring pabuaté tuyuh
 ngruruh sané dados pituduh,
 Darma pamaculé sampun mategul kukuh
 maiket masaet raket ngulati jagaté landuh.

sakewala tityang tandruh
reh aab jagaté buduh
jadmané ngruruh sané aluh
 sasukat betoné tumbuh mapunduh
 tanah tegalé di Renon tuh
 umah sewané nyansan tumbuh
 wong sunantara landuh
 petaniné gaduh, duuh, duuh,

Toyané puek, padiné berek, sunariné engsek
gumatat gumitité lek,
petaniné sesek.
subaké babak nyebak nung kayak.

Putu Éka Guna Yasa

SAKÉNAN

Pertiwiné matumpuk mapanta gegemuk
Tulya kakia ngulayang kambang ring telenging sagara
Genah para sadaka ngaturang sadana
Ngamargiang puja, tantra, yantra, mantra
Nglinggayang Ida ring suksma sarira

Nguni Ida sang sakyamuni,
Angedon lango ngaruruh kalangen ring genahé puniki
Ngeton tanggun langité pelung ekung,
nyuratang daleming sagarané kalangkung
Nunggilang sabdabayuidepé ring tungtung
magantung ring padaning kung.

Nguni Ida Sang Sakyamuni,
mapuja mabakti.
Mangkin makinkin para janané nampekin
sasampuné pariwisataané kaangkabin
alas wanané sami kaangkenin,
pura, purana, lan purohitané katinggalin
Mugi Sang Sankyamuni sida nyuryanin

Ni Kadék Widiasih

SEMAYA RING WONGAYA

Kantun masasah nututin paliaté
Sakadi luuné tan kapiara
Sambéh, maideran pangguh ring margi
Mangencegin asing genah
Nylusup ring selag-selagan tamané asri
Nylepitang raga, ngaduang urip
Natak nadahang kapiolasan asih
Minab mangda kasuécanin
Ring sang kuasan gumi
Né meraga wicaksana, pradnyan
Semangdé ipun tan kadangsek kadi luuné
Icén ipun tekén kauripan
Kagisian urip mangda enteg mamarga
Tuah rarapan semaya mapupul iriki
Kantun kapendem, karaksa, kadaluwarsa
Semaya ngambiar majampi-jampi
Ngulah ngenah kadén élah
Ngentungin semita amonto genep
Tiang mendep diastun nyanggupin
Depang, semayané mayang di tanggun lidahé

Ni Kadék Widiasih

GURIT RING DÉNPASAR

Tukang gurit nampakang gerit
Tiang linglung tan pabayu
Mapuara nguci suarané seeb
Tan paarti ngamurti wacana
Diastun wantah rarambangan
Saking suksma né tamis kepur
Iriki waluya pangguh panglipur
Ngampakang sarin manah
Saking gurit-guritan
Tiang majeritan
Matur uning ring maha buana.

I G N Wiriawan

KERTALANGU

Tungtunging Dénpasaré kangin..
Tongosné ngulangunin..
Kekayonan masanding tanpa tanding..
Boya gunung boya segara..
Nanging budyané mabudi..
Ditu makejang kasobyahang..
Malaib ngalintang sambilang nembang..
Tongos malelanguan..
Apang mabudi kerta..
Sangkaning langu ngulangunin..
Kerta mapuara kerti..
Kerta langu..
Langité matembang girang..

I G N Wiriawan

KA DÉNPASAR

: *(Mani Puan Tatujoné Apang Tusing Magrudugan)*

Magrudugan..

Makejang buka gancang

Nuju paling diwang

Apang nemu galang

Tatujoné

Nyambung urip

Ngulah arip

Kéwala apang tusing gudip

Ka Dénpasar

Mabekel gina

Apang maguna

Anggon sasana

Apang Tusing

Ngadokang pongah

Apa buin punyah

Sinah mabudi tawah

Mani puan

Ajiang

Lestariang

Eda alihanga dagang

Apang buka l bintang

Dénpasaré ngawinan petengé

galang

PANGAWI

I Madé Suarsa. Dosén Sastra Indonésia, Fakultas Sastra UNUD puniki embas ring Gianyar 15 Méi 1954. Ngantos mangkin, sampun ping kalih ngamolihang Penghargaan Sastra Rancagé, ring warsa 2004 antuk pupulan puisi “Ang Ah lan Ah Ang”, raris ring warsa 2006 antuk pupulan puisi “Gedé Ombak Gedé Angin”. Ipun taler sampun ngamedalang makudang-kudang buku, minakadi “Ang Ah lan Ah Ang”, Pupulan Puisi Bali Anyar (2004), Kunang-kunang Anarung Sasi – Pupulan Puisi Bali Anyar (2007), taler sané pinih anyar pupulan cerpén “Nguntul Tanah Nuléngék Langit” (2013). Nénten ja indik sastra Bali modérn kémanten, taler ipun ngripta makudang-kudang sastra Bali klasik, minakadi Prastanika Parwa lan Swargarohana Parwa (1999), Geguritan Sastrodayanan Tattwa, Geguritan Kanakaning Kanaka (2008).

I Gdé Nala Antara. Alumni sastra Bali UNUD puniki embas ring Désa Seraya Karangasem, 26 Maret 1962. Né mangkin dados dosén taler ketua jurusan sastra Bali UNUD. Seneng mareriptan sadawegé kantun dados guru ring SMP taler SMA ring Karangasem (1987-1990). Santukan uratianyané ring basa Bali, ipun kajodi dados ketua Badan Pembina Bahasa, Aksara, dan Sastra Bali, taler wakil ketua Ikatan Dosén Budaya Déerah Indonésia (IKABUDI)

Agung Wiyat S Ardhi. Embas ring Gianyar warsa 1946. Dané taler kasumbang dados pragina Drama Gong. Ngamolihang hadiah sastra Rancagé warsa 2001 antuk cakepan mamurda “Gending Girang Sisi Pakerisan”. Taler ngamolihang hadiah sastra Rancagé warsa 2010 antuk bhaktin dané nyobiahang sastra Bali modern maring para yowana lan parajanané.

Putu Ari Kurnia Budiassa. Embas ring Dénpasar 18 Agustus 1995, né mangkin sampun muputang ngaruruh kawruhan ring SMA Negeri 3 Dénpasar. Ipun sampun seneng ngawi sastra saking SMA taler aktif pinaka aktivis HIV AIDS kota Dénpasar. Ring warsa 2013 pinaka pemenang I lomba cerpén kota Dénpasar, taler molihang juara II lomba cerpén Pésta Kesenian Bali sané kaping XXXV.

Luh Yési Candrika. Embas ring Dénpasar, 20 Oktober 1990. Ipun wantah alumni Jurusan Sastra Bali UNUD. Sadina-dina mangkin dados

guru basa Bali ring SMP taler dados pembina sastra. Makudang-kudang reriptané sampun naenin munggah ring rubrik Bali Orti. Taler dados silih tunggil pangrémba ring dialog sastra Purnama Badrawada ring Pura Jagat Natha Dénpasar.

Déwa Ayu Carma Citrawati. Embas ring Getakan, Banjarangkan Klungkung, 24 Fébruari 1990. Sané mangkin dados guru basa Bali ring SMP Negeri 3 Dénpasar. Ring warsa 2007 ngrereh gelar S1 ring Jurusan Sastra Bali, Fakultas Sastra UNUD. Saking SMA sampun seneng makarya reriptaan marupa puisi miwah cerpén. Reriptaan marupa puisi miwah cerpén mabasa Bali sampun naenin munggah ring rubrik Bali Orti Koran Bali Post.

I Gdé Dharna. Embas ring Sukasada 27 Oktober 1931. Namatang pendidikan ring SMA Bagian C Singaraja warsa 1955. Dané taler kasumbang dados pencipta lagu. Naenin makarya dados pegawai Kantor Departemen Perdagangan Buleleng, Ketua Harian Museum Buleleng (2002-ngantos mangking). Naenin dados anggota DPRD Buleleng (1964-1965). Karya sastra sané sampun kawedar, “Kobarang Apiné” (pupulan naskah drama lan puisi, Buratwangi, 1990). “Perang Bali” (pupulan puisi, Balai Bahasa, 1999). “Léak Mecelek” (pupulan puisi, Balai Bahasa dan Buratwangi, 2001). Ngamolihang penghargaan Dharma Kusuma (1980), Wija Kusuma (1981), Rancagé (2000). Taler polih Widya Pataka saking Gubernur Bali antuk buku mamurda “Dasa Tali Dogén”.

Ni Madé Ari Dwijyanthi. Embas ring Tabanan 21 Agustus 1988. Seneng ring sastra Bali saking SMA kantos ngelantur ngeranjing ring Sastra Bali UNUD warsa 2006. Naenin dados pangrémba ring Bali Orti ngantos warsa 2012. Sampun makarya makudang-kudang puisi taler cerpén sané mabasa Bali taler mabasa Indonésia. Né mangkin dados wartawan ring Pos Bali ngrémba rubrik Média Suari pinaka silih sinunggil rubrik mabasa Bali sajeroning média massa sané wénten ring Bali.

NyomanTusthi Eddy. Embas ring Dusun Pidpid, Abang, Karangasem, duk tanggal 12 Désémber 1945. Tamat Fakultas Keguruan dan Ilmu Pendidikan (FKIP) Singaraja jurusan Bahasa dan Sastra Indonésia warsa 1969. Lianan dados guru taler masesuratan luih ipun; puisi, cerpén, esai,

kritik nganggén basa Bali lan basa Indonésia. Ngamolihang hadiah sastra Rancagé warsa 2004. Ngamolihang piagam Memajukan Sastra Bali Anyar saking Sabha Sastra Bali warsa 1999.

I Gusti Putu Bawa Samar Gantang. Embas ring Tabanan 27 Septémber 1949. Ngawit nyurat susastra Bali anyar lan Indonésia, warsa 1968 dugas ngeranjing ring SMA Tabanan. Nagingin siaran ngwacén puisi ring RRI, Menara Studio Broadcasting, Casanova lan Kini Jani Tabanan. Lunga ka Dénpasar saking Tabanan satata ngalinggihin sepéda ontél. Ring Tabanan ngwangun Sanggar Pelangi 1976 – sané magentos aran dados Sanggar Sastra Remaja Indonesia (SSRI-Bali) – sané nglimbakang sastra Bali modérn lan Indonésia ring siswa SD, SMP, SMA/SMK lan anom-anomé sané oneng susastra. Warsa 2001 polih penghargaan Cakepan saking majalah Sarad. Warsa 2003 ngamolihang hadiah Sastra Rancagé. Warsa 2012 ngamolihang penghargaan Widya Pataka sakéng Gubernur Bali antuk buku mamurdha Léak Kota Pala.

Pandé Kadék Juliana. Embas ring Taman Bali, Bangli tanggal 16 Novémber 1986. Lulusan Sastra Bali Univérsitas Udayana puniki sampun aktif ngripta sastra sadawegé kantun dados mahasiswa. Akéh sampun rriptan ipuné sané munggah ring Bali Post. Naenin dados Ketua Senat Fakultas Sastra UNUD, sané mangkin dados pegawé Departemen Agama RI ring Jakarta.

IBW Widiasa Kenitén. Pengawi sastra Bali modern sané embas ring Karangasem 20 Januari 1967, pinaka silih sinunggil pangawi sané rajin pisan ngamedalang cakepan marupa pupulan puisi taler cerpén. Ngamolihang Sastra Rancagé ring warsa 2006 antuk pupulam cerpén “Buduh Nglawang”. Akéhan kakawian ipuné mijil ring media minakadi Buratwangi, Canang Sari, taler Bali Orti.

DG. Kumarsana. Pengawi sané aktif ring sastra Indonésia puniki embas ring Dénpasar, 13 April 1965. Sampun akéh rriptan ipuné sané munggah ring média masa, minakadi ring Nusa, Gema Karya, Sumut Pos, Bali Post, taler Buletin Jejak. Buku sané sampun kamedalang inggih punika “Senggégér” (2010) taler “Komédi Birokrat” (2010). Né mangkin ipun jenek ring Péngsong, Dusun Tegalwaru, Labuapi Lombok.

IDK Raka Kusuma. Pangawi sané embas ring Klungkung 21 Novémber 1957 sampun seneng nyurat sastra saking ngawitin dados guru ring sekolah dasar. Yadiastun ring pangawitnyané ipun nyurat reriptan ring basa Indonésia, nanging selanturnyané akéhan ipun nyurat ring basa Bali. Raka Kusuma pinaka silih tunggil pangremba ring Sanggar Buratwangi. Ring warsa 2002 taler 2011 ngamolihang Sastra Rancagé antuk baktin ipun ring pangembangan sastra Bali malarapan antuk Majalah Buratwangi. Ngamolihang Penghargaan Widya Pataka saking Gubernur Bali warsa 2012. Cakepan sané sampun kamedalang minakadi Lontar Rograg (1991), I Balar (2006), taler Ngambar Bulan (2006).

I Nyoman Manda. Pénsiunan guru puniki sampun seneng ngulik sastra saking warsa 1961 daweg kantun ngranjing ring Singaraja. Embas ring Banjar Pasdalem Gianyar duk 14 April 1938, ipun ngawitin dados pangawi antuk makarya puisi sastra Indonésia sadurungé ngawi nganggén basa Bali. Cerpén taler puisi ipuné akéh mungguh ring Harian Merdéka, Suara Karya, Bali Post, taler ring harian Nusa. Kantos warsa 2013, ipun sampun ngamedalang 80 cakepan marupa pupulan puisi, pupulan cerpén, roman, novél, muah drama Bali modérn. Ngamolihang penghargaan Sastra Rancagé ping 3, duk warsa 1998, 2003, taler ring 2008.

Ida Bagus Surya Matra Atmaja. Alumni Jurusan Sastra Bali UNUD puniki embas ring Sibetan, Bebandem Karangasem, 13 April 1986. Né mangkin sampun dados guru basa Bali ring SMPN 4 Tegallalang. Seneng ring sastra sampun saking SMA utaminnyané téater, nika mawinan ring warsa 2003-2004 dados ketua téater Kertas SMA 1 Amlapura. Daweg ngranjing ring Fakultas Sastra taler sareng aktif ring Téater Poerbatjaraka (dados ketua 2006-2007). Ring warsa 2005. sareng téater Raka Rai pentas mewakili Bali ring Taman Ismail Marsuki.

I Wayan Paing. Embas ring Désa Pakraman Gulinten, Désa Bunutan, Abang, Karangasem tanggal 06 April 1983. Sané mangkin makarya ring SD Negeri 6 Bunutan. Ngawit malajahang déwék ring sastra daweg SMA antuk binaan IDK Raka Kusuma ring kegiatan ékstra sastra SMAN 2 Amlapura warsa 1999 ngantos warsa 2001. Ngamolihang sutradara Terbaik II ring Féstival Téater IKIP Negeri Singaraja warsa 2003. Cakepan sané sampun kamedalang "COR" warsa 2009 lan Gancaran Mersun warsa 2012.

Ida Bagus Gdé Parwita. Embas ring Désa Tihingan, Klungkung tanggal 19 Nopémber 1960. Guru ring SMP PGRI lan SMA Pariwisata PGRI Klungkung. Ngamolihang juara kaping siki penulis ésai mabasa Indonésia sajabag Bali ring Balai Bahasa Dénpasar warsa 2001. Juara kaping tiga penyurat tembang Puputan Klungkung warsa 2001. Juara kaping siki penyurat tembang Puputan Klungkung warsa 2002. Ngamolihang Widya Pataka saking Gubernur Bali warsa 2009 antuk buku pupulan puisi Bali mamurdha “Wayang”.

Ida Bagus Rai Putra. Embas ring Tanah Pidada Sengguan Klungkung, gumanti oneng masurat-suratan. Pingajeng sajroning nyurat cerpén kalih puisi. Saking dados siswa SMA I Klungkung sampun ngasuh Mading (Majalah Dinding), sesampuné kuliah ring Sastra Bali Fakultas Sastra Unud, nagingin sesuratan ring Majalah Kanaka, Manguri, raris lintangan ring 10 masa (warsa 1987 – 1998) dados wartawan anggota PWI Bali, ngasuh SKM Karya Bakti. Makatah karya puisi sané kawangun nyabran ngaminggu ring Mingguan Karya Bakti, santukan ida dados “gawang” rubrik Bakti Remaja Bakti Budaya, maprakanti sareng Umbu Landu Paranggi.

I Dewa Gedé Windhu Sancaya. Embas ring Tabanan, 27 Oktober 1960, tur sampun magenah ring Dénpasar warsa 1960. Saking kari masekolah ring SMPN 1 Dénpasar sampun seneng ngaryanin sesuratan marupa karya sastra sané kaunggahang ring majalah dinding sekolah. Kasenengan nyurat sastra miwah main drama modérn nglantur rauh ring SMAN 1 Dénpasar miwah ring mahasiswa Fakultas Sastra Unud Jurusan Basa lan Sastra Bali warsa 1980-an. Polih taler masikian sareng Téater Poliklinik pimpinan Abu Bakar, Téater Kampus Unud miwah ngaryanin Club Studi Téater Fakultas Sastra Unud sané ngwentenang pementasan drama “Di Bawah Bulan” keliling Bali lan Lombok warsa 1983.

Siosan ring nyurat sastra Bali anyar, Windhu Sancaya taler nyurat sastra Indonésia modérn, mrupa puisi, cerpén lan drama, miwah esai. Karya-karayannyané polih kaunggahang ring surat kabar Bali Post, Nusa Tenggara (Nusa Bali), Simponi, Kompas, Cintamani, Warta Hindu Dharma, Orti Bali, lan sané tiosan. Naenin polih juara ngaryanin cerita péndék, drama lan puisi, sané keselentarayang olih Pémda Bali, Listibiya Bali lan Univérsitas Udayana. Ring warsa 1980-an sering nagingin acara drama ring TVRI Dénpasar. Taler naenin polih juara penulisan artikel Pésta Kesenian Bali warsa 2000. Naenin taler dados juara pinaka aktor

lan sutradara drama terbaik Porseni Mahasiswa Unud warsa 1981.

Silih sinunggil cerpénnyané sané mamurda *Dark Sky over the Village* sareng kapupulang ring pupulan satua bawak mabasa Inggris: *Bali Behin the Seen*. Karya sastra Bali pakaryannyané kapupulang ring kembang rampé sastra Bali, sekadi Puyung (1981), Ngayah (1982), AI (1983), Gending Pangapti (1984), Crakian (1996). Warsa 2004 ngamolihang Hadiah Sastra Rancagé, saking “Ajip Rosidi Foundation”, antuk pupulan Puisi lan Cerpén Bali modérn sané mamurda *Coffee Shop*. Saking warsa 1986 kamanggehang dados dosén ring Jurusan Sastra Bali Fakultas Sastra Univérsitas Udayana rauh mangkin.

I Madé Sanggra. Pengawi sané embas ring Gianyar duk warsa 1926 puniki, pinaka silih tunggil pengawi senior sané paguh nindihin sastra Bali modérn. Ngawitin ngripta sastra Bali modérn duk warsa 1970 antuk nyarengin sayembara taler dados juara ring sayembara punika antuk cerpén *Katemu ring Tampak Siring*. Cerpéné puniki taler kadadosang lakon arja olih Prof. Dr. I Wayan Dibia daweg Pésta Kesenian Bali (PKB) 2005. Pupulan puisi *Kidung Républik* (1997), ngamolihang Penghargaan Sastra Rancagé ring warsa 2008. Pupulan puisi puniki pinaka pupulan puisi sastra Bali modérn sané kapertama ngamolihang Penghargaan Sastra Rancagé.

I Gusti Gedé Djelantik Santha. Djelantik Santha punika wasan ipuné sané sampun kasub ri sejeroning para sastrawan ring Bali. Embas ring désa Selat Karangasem 12 Agustus 1941, seneng ngripta sastra daweg kantun masekolah ring Sekolah Rakyat (1949). Djelantik Santha sampun makarya makudang-kudang puisi, cerpén taler novél sané mabasa Bali. Novél ipun sané mamurda Sembalun Rinjani ngamolihang penghargaan Sastra Rancagé duk warsa 2002.

I Madé Sugianto. Embas ring Lodalang, 19 April 1979 nemonin dina Sugihan Jawa; Wrespati Wagé Sungsang. Nika mawinan mémé bapané ngaryanin aran nganutin dina sugianné ento dados Sugianto. Ring warsa 2007 ngwangun usaha Majalah Ekspresi, ipun dados pemimpin redaksi. Warsa 2009 ngawitin nyurat sastra Bali modérn. Ring warsa punika taler ngwantu pangawi mabasa Bali ngamedalang buku antuk terbitan Pustaka Ekspresi. Warsa 2012 lan 2013 ngamolihang hadiah sastra Rancagé majeng ring utsahan danéné nglimbakang sastra Bali modérn tur novel alit mamurda *Sentana*. Sané mangkin makarya dados

wartawan ring Harian Umum NusaBali. Meneng ring Banjar Lodalang, Désa Kukuh, Marga, Tabanan.

Raka Sukmadi. Embas ring Dénpasar duk warsa 1957. Alumni Fakultas Sastra Unud puniki sampun seneng ring sastra sedaweg dados mahasiswa. Né mangkin sampun purna bhakti saking Dinas Kebudayaan Provinsi Bali.

Putu Agus Sutramama. Embas ring Marga 9 Fébruari 1984. Malajah nyurat sastra Bali modérn kala ngranjing ring SMAN 2 Tabanan. Kalih cerpén sané kasurat daweg ngranjing ring SMA, raris kamuat ring Wiyata Mandala (Bali Post) mamurda “Kenangan Manis” dan “Keliab Kalung” warsa 2004. Ring warsa 2003, reiptan dané marupa satua bawak muang artikel bertema Bali katerjemahang tur kasurat ring Bali Travel News (Bali Post). Daweg punika, dané nyurat susastra nganggén bahasa Indonésia. Sasukat Bali Orti kamijilang marupa sisipan olih Bali Post, dané malih ngrenjit ngripta karya basa Bali modérn marupa satua bawak, gancaran, muang paparikan. Ngamedalang cakepan mamura *Bulan Satwak* warsa 2013.

Putu Reland Dafincy Tangkas. Embas ring Dénpasar 23 Januari 1988. Né mangkin meneng ring Jalan Gunung Lebah I Gang I No. 5 Tegal Harum, Dénpasar. Kantun ngeranjing ring Pascasarjana Univérsitas Udayana Program Studi Lingusitik. Ngawit ngripta sastra Bali modérn saking warsa 2010, nyarengin ring rubrik Bali Orti Koran Bali Post.

Madé Reland Udayana Tangkas. Embas ring Dénpasar, 25 Maret 1990. Né mangkin meneng ring Jalan Gunung Lebah I Gang I No. 5 Tegal Harum, Dénpasar. Kantun ngeranjing ring Pascasarjana Univérsitas Udayana Program Studi Lingusitik. Ngawit ngripta sastra Bali modérn saking warsa 2010, nyarengin ring rubrik Bali Orti Koran Bali Post.

Made Taro. Embas ring Dénpasar duk warsa 1940, ipun sampun seneng ring kasusastraan saking dados guru ring SMA 2 Dénpasar. Ring warsa 1988 ngamolihang Penghargaan Adi Karya saking Ikatan Perusahaan Penerbit Indonesia (IKAPI). Rauh mangkin sampun ngamedalang makudang-kudang buku pupulan satua lan gending raré, santukan banget uratian ipuné ring kawéntenan satua Bali lan plalianan tradisional Bali. Ring warsa 2005 ngamolihang Anugerah

Sastra Rancagé antuk usaha ipuné ngalimbakang basa lan sastra Bali. I Madé Taro taler dados guru ring sekolah ring Darwin, Australia. Ipun taler madué Sanggar Kukuruyuk sané dados genah ipuné ngamargiang swadarma pinaka guru pengajian ngajahin alit-alit ring plalianan tradisional Bali.

Tudékamatra. Wastan sujatinnyané I Putu Gedé Raka Prama Putra. Embas ring rahina Anggara Kliwon Tambir 18 Désémber 1990. Meneng ring Désa Kemenuh Sukawati Gianyar. Ngawitin malajah ngripta daweg kari masekolah ring SMAN 1 Blahbatuh. Sané mangkin dané kantun dados mahasiswa ring FE Univérsitas Mahéndradatta. Reriptannyané sané marupa puisi, gancaran, lan cerita cutet mabasa Bali kalih Indénesia, sampun naenin munggah ring Bali Orti, Bali Post, Majalah Ekspresi, miwah ring Denpost. Pupulan sané sampun medal mamurda *Padang Tuh* warsa 2013.

Putu Eka Guna Yasa. Embas ring Selat Tengah, Susut, Bangli, 6 Januari 1990. Ipun wantah alumni ring Jurusan Sastra Bali Fakultas Sastra UNUD. Sadina-dina makarya ring Unit Pelayanan Téknis Lontar Univérsitas Udayana, sinambi nglanturang ngruruh kawruhan ring Magister Linguistik Pascasarjana UNUD. Seneng ring nyurat reriptan indik basa, aksara, muah sastra Bali saking SMP. Makudang-kudang rariptané naenin kaunggahang ring rubrik Bali Orti. Né mangkin nyarengin dados pangrémba ring rembug sastra Purnama Badrawada, taler dados penggagas UKM Kesenian Satyam Siwam Sundaram Fakultas Sastra UNUD.

Ni Kadék Widiasih. Embas ring Banjar Magetelu, Desa Tista, Kecamatan Abang, Karangasem duk tanggal 14 Juni 1984. Ipun malajah marariptan ngawit warsa 2007, kakawian ipun nganggén basa Bali. Rariptan ipun ngawit mijil ring média Bali Post marupa puisi lan Gancaran, saking bulan Novémber 2007. Taler kawedar ring Pos Bali.

IGN Wiriawan. Embas ring Carangsari duk warsa 1989. Alumnus Fakultas Sastra UNUD, sané mangkin pinaka tenaga kontrak Dinas Kebudayaan Provinsi Bali ring Perpustakaan Lontar.

Pamipil

I Gedé Gita Purnama Arsa Putra. Embas ring Dénpasar, 29 Oktober 1985. Gedé namatang pendidikan sarjana ring program Bahasa dan Sastra Bali Univérsitas Udayana warsa 2008. Raris nglanturang pascasarjana ring konséntrasi Wacana Sastra Jurusan Linguistik Univérsitas Udayana. Oneng nyurat puisi, cerpén lan esai ngawit SMP. Pakaryannyané kawedar ring makudang-kudang media, luiré: Bali Post, Wiyata Mandala, Canang Sari lan Satua.

I Nyoman Darma Putra. Embas ring Dénpasar warsa 1961. Namatang pendidikan sarjana sastra Indonésia ring Fakultas Sastra Univérsitas Udayana warsa 1985. Program master ring University of Sydney warsa 1994, lan program doktor ring The University of Queensland warsa 2003. Ngawit warsa 1986 ngantos mangkin, dané dados dosén ring almamaternyané. Sampun ngawedarang makudang-kudang artikel ring jurnal internasional, kalih cakepan sane utama makadi *Tonggak Baru Sastra Bali Modérn* (Dénpasar: Pustaka Larasan, 2012 (2010;2000) lan *A Literary mirror; Balinese reflections on modernity and identity in the twentieth century* (Leiden: KITLV Press, 2011).

A.A. Ngurah Oka Wiranata. Embas ring Dénpasar 28 Novémber 1969. Ngawit SMP sampun madué kaonengan dados pangawi. Kaonengan nyurat sastra kalanturang daweg kuliah ring Fakultas Sastra Univérsitas Udayana ngantos mangkin. Kalih cakepan sampun prasida kapuputang nganutin swaginanyané sakadi *Menjadi Penyiar* (2006) lan *Kumpulan Opini: Tradisional Vs Modern* (2011).

Para Pangawi

I Madé Suarsa
Agung Wiyat S Ardhi
Gedé Nala Antara
I Putu Kurnia Budiasa
Luh Yési Candrika
Déwa Ayu Carma Citrawati
Gdé Dharna
Ni Madé Ari Dwijayanthi
Nyoman Tusthi Éddy
IGP Bawa Samar Gantang
Pandé Kadék Juliana
I Ketut Aryawan Kenceng
IBW Widiassa Kenitén
DG Kumarsana
IDK Raka Kusuma
Nyoman Manda
I Wayan Mareg
IB. Surya Mantra
I Wayan Paing
Ida Bagus Gdé Parwita
Ida Bagus Rai Putra
IDG Windhu Sancaya
I Madé Sangra
IGG Djelantik Santha
Madé Sugianto
Raka Sukmadi
Agoes Sutramama
Putu Réland Dafincy Tangkas
Madé Réland Udayana Tangkas
Madé Taro
Tudékamatra
IGN Wiriawan
Putu Éka Guna Yasa

Buku puniki nénten lian wantah buku pupulan puisi kaping kalih sané madaging puisi indik kawéntenan Kota Dénpasar. Cakepan kapertama nganggén Basa Indonésia sané mamurda *Déndang Dénpasar Nyiur Sanur*, sané medal ring panguntat warsa 2012. Buku kapertama madaging 106 puisi sané karipta olih 45 pangawi, kaluncurang olih Walikota Dénpasar, Bapak Ida Bagus Rai Dharmawijaya Mantra ring sajeroning acara Dénpasar Féstival 2012. Buku sané kaping kalih puniki pateh sakadi buku kapertama, sakéwanten basannyané mabinayan inggih punika mabasa Bali tur madaging 100 puisi. Puisi-puisi inucap taler nyihnayang kawéntenan Kota Dénpasar ngawit saking Puputan Badung ring warsa 1906 kantos rauh ring panglimbaknyané kadi mangkin.



Buku ini tak lain adalah buku kumpulan puisi yang kedua yang memuat sajak bertema kota Denpasar. Buku pertama menggunakan bahasa Indonesia berjudul *Dendang Denpasar Nyiur Sanur*, yang diterbitkan di akhir tahun 2012. Buku pertama berisi 106 puisi yang ditulis oleh 45 pengarang, diluncurkan oleh Walikota Denpasar, Bapak Ida Bagus Rai Dharmawijaya Mantra saat acara Denpasar Festival 2012. Buku kedua ini sama seperti buku pertama, hanya beda bahasa yakni menggunakan bahasa Bali dan berisi 100 puisi. Kumpulan puisi ini juga menceritakan keberadaan kota Denpasar mulai dari Puputan Badung pada tahun 1906 hingga perkembangan zaman seperti saat ini.



PEMKOT DENPASAR

ISBN 978-602-7610-11-8



9 786027 161011 8

PUSTAKA EKSPRESI